

GOSOS



## A Santa Zigliana (16 febbraio)

### I

(Testo presente nella raccolta Bulloni)

Martire in tenera edade,  
de sa lughe eterna isposa,  
Santa pro nois pregade  
Giuliana gloriosa.

S'imperatore romanu  
resistende in sos intentos  
de barbaros sentimentos,  
s'impìu Massimianu,  
cun martiriu istranu  
bos dat morte orrorosa.

Santa pro nois pregade...

In una prejone oscura  
mentre pregas fervorosa  
una lughe luminosa  
bos rendet tottu segura  
chi bois virgine pura  
superades vittoriosa.

Santa pro nois pregade...

Evilasio su *prefetto*  
a isposa bos giamada  
ma bois rifiutada  
sa manu cun *disonore*,  
bois mansueta *anzone*  
pregades meda affettuosa.

Santa pro nois pregade...

Su prefetto *coraggiosu*  
ponet sa caldaia in fogu  
de ozu bugliende in logu,  
bos decollat *crudelmente*:  
bois dades *finalmente*  
s'anima a Deus dizzosa.

Santa pro nois pregade...

Azzottada aspramente  
cun faras de ferru forte,  
de s'inferru e de sa morte  
triunfestis giustamente,  
de Gesus divinamente  
in cuss' ora laboriosa.

Santa pro nois pregade...

Babbu 'ostru *africanu*  
continuu bos turmentesit  
e bastonadas bos desit  
senz' alcuna *pietade*  
cun grande *crudelidade*  
in aria pius furiosa.

Santa pro nois pregade...

In Nicomedia *naschida*  
amazzone celestiale  
corona e palma triunfale  
accuistades cun *ispantu*  
e de s'eternu *piantu*  
salvadenos amorosa.

Santa pro nois pregade  
Giuliana gloriosa.

## II

(Testo presente nella raccolta Calvisi)

De su chelu bella aurora  
naschis de grazias lughente,  
sias de sa devota gente,  
Giuliana, intercessora.

Pizzinna de pagos annos,  
plena de santa dottrina,  
fuis s'eterna ruina,  
gelosa imparas sos mannos,  
publicas sos disingannos  
fatta celeste dottora.

Sias de sa devota gente...

Sa romana podestade  
ardente d'ira e furore  
cumandat chi adores  
sas falsas divinidades,  
ma de tale voluntade  
ses valente binchidora.

Sias de sa devota gente...

Su tiranu cun lamentos  
cumpatit sa malasorte,  
pro evitare sa morte  
promittit vanos cuntentos:  
disprezias sos turmentos,  
de Deus ses servidora.

Sias de sa devota gente...

D'adorare idolos vanos  
cun astuzia meda vile  
su presidente gentile  
sollicitat sos cristianos:  
sos consizos inumanos  
disprezias superiora.

Sias de sa devota gente...

De candore angelicale  
ses dotada e de bellea,  
persighit tanta pureza  
cudd' inimigu infernale:  
bois su mostru ligades  
cun sa cadena in cuss' ora.

Sias de sa devota gente...

In prejone maltrattada  
suffris pesantes cadenas  
cun angustias e penas,  
moris a filu d'ispada:  
pro cussu ses nominada  
de sa fide difensora.

Sias de sa devota gente...

Su gentile furibundu  
occultat su corpus santu,  
s'incontrat cun mannu ispantu  
in unu logu profundu;  
occulta fis a su mundu,  
sa fama bivet ancora.

Sias de sa devota gente,  
Giuliana, intercessora.

## A Nostra Segnora 'e s'Annossata (25 marzo)

### I

(Testo presente nelle raccolte Calvisi, Bulloni e in fogli sciolti)

De Cristos, lughe increada,  
sezis dorada aurora,  
amparadenos, Segnora,  
Virgo de s'Annunziata.

Ab eternu fit previstu  
in sa corte celestiale  
esser bois mama tale  
de su fizu Gesu Cristu  
pro tenner s'omine tristu  
reparu a sa prima errada.  
Amparadenos, Segnora...

Profetizat Daniele  
su tempus chi det restare  
senz' ancora s'incarnare  
su divinu Emmanuele  
e, compridu, Grabiele  
bos benit cun s'imbasciada.  
Amparadenos, Segnora...

«Ave – bos narat – Maria,  
tottu de grassias piena,  
casta e candid' assussena  
de chelu e terra allegria,  
de Cristos, veru Messia,  
sezis mama signalada».  
Amparadenos, Segnora...

Comente podet restare  
mama senz' aer consorte,  
si de sa celeste corte  
non benit pro fecundare  
restende virgine e dare  
lughe tantu antizipada?

Amparadenos, Segnora...

Su Ispiritu divinu  
in bois det operare  
custu partu singulare  
e misteriu peregrinu!  
restende de Deus trinu  
sacradu templu e morada.

Amparadenos, Segnora...

Su celeste ambasciadore  
custa nova bos portesit;  
abbenes chi bos turbesit,  
su peregrinu favore  
accettades cun amore  
umilmente rassegnada.

Amparadenos, Segnora...

«Ecce – nades accettande –  
de Mama sa dignidade!»  
E vestit s'Immensu e Grande  
sa mortale umanidade,  
e restat sa magestade  
infinita abbreviada.

Amparadenos, Segnora...

Operadu est su misteriu,  
umanadu est su Divinu,  
restat s'omine mischinu  
liberu de cattiveriu:  
in bois at refrigeriu  
s'alma afflitta isconsolada.

Amparadenos, Segnora...

Tantu a Deus aggradesit  
sa umilidade 'ostra,  
chi custa natura nostra  
cun Isse s'imparentesit,  
ei s'omine logresit  
sorte e dicitia mezorada.



Amparadenos, Signora...

Sezis de grassias mare,  
sezis de grassias mina,  
sezis cura e meighina  
in portentos singulare,  
sezis norte pro ghiare  
s'anima ch' andat errada.

Amparadenos, Signora...

In custu templu sacradu  
de probatica piscina  
incontrat sa meighina  
su afflittu, su bardadu;  
su tristu e necessitadu  
consighit diccia colmada.

Amparadenos, Signora...

In custas valles remotas  
dispensade sos favores  
a sos tristos peccadores  
chi cun supplicas e votos  
benin umiles, devotos,  
pro esser da tottu adorada.

In chelu e terra esaltada  
soverana imperadora,  
amparadenos, Signora,  
Virgo de s'Annunziata.

## A Santu Jorgi (23 aprile)

## I

(Testo presente nelle raccolte Calvisi e Bulloni)

In su chelu cun onore  
ses de gloria laureadu,  
Giorgi martire sacradu  
prega pro su peccadore.

In Cappadoccia naschidu  
de nobile discendenza,  
cando cun impertinenzia  
su cristianu est pessighidu,  
introduende s'olvidu  
de Cristos s'imperadore.

Giorgi martire sacradu...

Fattu de truppas tribunu  
in sas battaglias de Marte,  
militas bassu s'istendarte  
de su Re ch' est trinu e unu  
a su tempus chi nessunu  
lu cunfessat pro timore.

Giorgi martire sacradu...

Faghes santu disperdissiu  
dande a poveros sos benes,  
rinunzias a cantu tenes  
pro esser esente de vizio,  
cunfessas in su giudiziu  
a Cristos veru Signore.

Giorgi martire sacradu...

Surpresu Dioclezianu  
a s'intender nominare  
su nomen de cristianu  
ch' isse at mandadu a burrare,  
ti procurat allettare  
cun dativos e onores.

Giorgi martire sacradu...

Persuadet de adorare  
idulos chene sentidu,  
ma Giorgi meda attrividu  
detestat s'idolatrare,  
neghende a sos deos dare  
latria, incensu e onore.

Giorgi martire sacradu...

Pro custa risoluzione  
inconclusa e permanente  
fustes, rodas, fogu ardente  
t'applican in sa persone,  
o vittrice passione  
d'azzottas, rabbia e furore.

Giorgi martire sacradu...

S'imperadore insolente  
pro non poder triunfare  
ti cumandat degogliare  
in sas partes de oriente,  
ue che sole lughente  
mustras nou risplendore.

Giorgi martire sacradu...

Pustis d'esser degogliadu  
e ottentu sa vittoria,  
in tronu d'ecclsa gloria  
s'ispiritu as collocadu,  
su corpus santu adoradu  
in terra cun grande onore.

Giorgi martire sacradu...

E già chi cun Deus tantu  
ses in chelu poderosu,  
de su dragone orgogliosu  
defendenos, Giorgi Santu,  
e de s'eternu piantu  
chi nos dat custu timore.

## Giorgi martire sacradu...

Cun cultu particolare  
sos votos ti tributamus  
e pro cussu t'invocamus  
che patronu titolare:  
cherzas pro Bitti alcansare  
alliviu in ogni dolore.

De sos martires fiore  
sezis su pius esaltadu,  
Giorgi martire sacradu  
prega pro su peccadore.

## II

(Testo presente nella raccolta Bulloni)

Martire isterminadore  
de su serpente infernale,  
salvanos de ogni male,  
Santu Giorgi protettore.

Fizu bene avventuradu  
de illustres cristianos,  
postu istestis in bonas manos  
e santamente educadu,  
pro ca fis predestinadu  
de Cappadocia isplendore.  
Salvanos de ogni male...

In sas truppas imperiales  
colonellu meda ornadu  
chirchestis cun prus coidadu  
sos benes celestiales,  
sende de sos temporales  
nobile dispreziadore.  
Salvanos de ogni male...

Non potende tollerare  
s'ingiusta persecuzione  
chi contr' a sa religione  
sighiat a infuriare,  
andestis a ti presentare  
a s'unicu imperadore.  
Salvanos de ogni male...

Ma innantis liberestis  
sos isciaos chi tenias  
e sas rendas chi aias  
a poveros distribuestis  
e gai ti preparestis  
a cumbatter cun valore.  
Salvanos de ogni male...

A s'intenderti restesit  
attonitu Dioclezianu  
e a ti fagher paganu  
cun lusingas t'ertesit,  
riccas rendas t'offerzesit  
e gradu de pius onore.  
Salvanos de ogni male...

Cun lusinga astuziosa  
non potendet' ingannare  
ti fattesit inserrare  
in prejone tenebrosa,  
trattendet' in ogni cosa  
cund' un'estremu rigore.  
Salvanos de ogni male...

Non logrende su chi bramatu  
cun sas penas de prejone,  
cust' infernale dragone  
a gherra aperta ti giamatu  
e sos membros t'infiamat  
cun ozu accesu de ardore.  
Salvanos de ogni male...

Pro fagher su corpus tou,  
si podet, a biculeddos,  
inventat rodas e 'urteddos  
su barbaru inzeniu sou,  
e unu turmentu nou  
binchet s'ateru in orrore.  
Salvanos de ogni male...

Tue però pius costante,  
grande Giorgi, in tanta pena,  
cun sa facce tua serena,  
cun s'aspettu giubilante,  
confundestis triunfante  
s'unicu persecutore.  
Salvanos de ogni male...

Non potende raffrenare  
de su coro s'allegria,  
intonas suave armonia  
e cominzas a cantare:  
«chie mi det separare  
dae su meu Signore?»  
Salvanos de ogni male...

Sos anghelos chi t'idian  
a su triunfu applaudesin,  
a sas penas ti animesin  
ch' ancora ti restaian,  
mentras ti preparaian  
corona de isplendore.  
Salvanos de ogni male...

Tando varios paganos  
connoschesin a Gesùs,  
e costantes meda piùs  
restesin sos cristianos,  
a sos benes soberanos  
aspirende cun fervore.  
Salvanos de ogni male...

Ma su principe inumanu,  
privu de sapidoria,  
nerzesit chi fit magia  
su podere soberanu:  
già s'impriu Dioclezianu  
si ostinesit in s'errore!  
Salvanos de ogni male...

Finalmente cun s'ispada  
sa sacra testa trunchesit  
ei s'anima 'olesit  
a sa patria disizada:  
o amina avventurada,  
o Giorgi triunfadore!  
Salvanos de ogni male...

O martire gloriosu,  
onore de s'oriente  
e de su nostru occidente  
ispantu meravigliosu,  
amparanos amorusu,  
sias nostru intercessore.

Salvanos de ogni male...

Pro te mezoret s'istadu,  
pro te triumfet su Re:  
custu populu pro te  
siat sempre prosperadu,  
unidu e pacificadu  
in ispiritu de amore.

Salvanos de ogni male...

Cun sa lanza fulminante  
ch' in manos t'at dadu Deus  
faghe a s'inimigu reu  
perpetua gherra incessante:  
de sa ecclesia militante  
sias sempre difensore.

Martire isterminadore  
de su serpente infernale,  
salvanos de ogni male,  
Santu Giorgi protettore.



## III

(Testo presente nella raccolta Bulloni)

Cavaglieri valorosu,  
de s'ecclisia santa onore,  
Giorgi martire gloriosu  
sias nostru intercessore.

Cappadocia t'at donadu  
illustres riccos natales,  
de fide ardente signales  
dae minore as dimustradu,  
cresches de grazia adornadu  
innantis de su Signore.

Giorgi martire gloriosu...

Appenas ses in edade  
de faghene su soldadu  
a s'esercitu aggregadu  
ti ses cun vera amistade,  
e a grande dignidade  
t'elevat s'imperadore.

Giorgi martire gloriosu...

Cun s'ispada coraggiosu,  
cun brazzu forte e valente  
persighis unu serpente  
a Silena luttuosu:  
de tale mostro orrorosu  
restadu ses binchidore.

Giorgi martire gloriosu...

Su serpente superadu  
de su brazzu tou potente,  
respirat tottu sa zente  
chi tantu aiat penadu,  
chi lacrimas an versadu  
atterridos de timore.

Giorgi martire gloriosu...

Su populu silenianu  
bidende tantu valore  
cun fide viva e ardore  
si rendet cun te cristianu,  
ti pigat pro capitane  
e ti tenet protettore.  
Giorgi martire gloriosu...

Bidende tanta cunversione,  
Dioclezianu imperadore,  
pienu d'ira e furore  
e d'infernale passione,  
de ti ponner in prejone  
cumandat cun rigore.  
Giorgi martire gloriosu...

Chi benzat istraziadu  
su corpus tou innocente  
cumandat su presidente  
e pro mortu t'at lassadu,  
ma prestu t'at risanadu  
su divinu Redentore.  
Giorgi martire gloriosu...

Pustis tanta resistenzia  
a su tempiu ses andadu  
ue Apollo veneradu  
fit chin meda frequenzia:  
li abbattis sa potenzia  
a su deus impostore.  
Giorgi martire gloriosu...

De sa grazia fortificadu  
suffris atteros tormentos  
pro ch' in eternos cuntentos  
benzas prestu trasportadu,  
e in ultimu degogliadu  
ses dae s'imperadore.  
Giorgi martire gloriosu...

A su chelu ses boladu  
ue bives gloriosu  
gosende cussu reposu  
chi su samben t'est costadu:  
pro chie t'at invocadu  
cunserva perenne amore.

Cavaglieri valorosu,  
de s'ecclisia santa onore,  
Giorgi martire gloriosu  
sias nostru intercessore.

**A Sant' Elias (I maggio)**

(Testo presente nelle raccolte Calvisi, Bulloni e in fogli sciolti)

Ses claru in sa profezia  
a dogni sacru iscrittore,  
defende su peccadore,  
patriarca Sant' Elias.

Dae Aron discendente,  
in Tesbite ses naschidu,  
su chelu t'at favoridu  
ca fis castu e innozente,  
cun incensu, coro e mente  
a Deus adoraia.

Defende su peccadore...

Cando fis in s'oriente  
e vicinu a su Giordanu  
sos corvos sero e manzanu  
cheret Deus ti alimenten,  
declaras in su torrente  
chi s'abba solu bivias.

Defende su peccadore...

Comente l'as minettadu  
non pioer in tres annos,  
Israele est in affannos,  
Acabu est arrabiadu  
e Deus ti at mandadu  
de Saretta sa gattia.

Defende su peccadore...

E pro chi pane t'at dadu  
cussa gattia mischina,  
l'aumentas sa farina,  
s'ozu l'as multiplicadu,  
su fizu est risuscitadu  
cando tue pregaia.

Defende su peccadore...

Tue isfidas sos profetas  
e de Bal sos sacerdotes,  
ca superare non potes  
chi los degoglias minettas,  
dae chelu fogu ispettas,  
sas vittimas brujaias.

Defende su peccadore...

Cumandas sian portados  
in su de Cissan riu,  
manc' unu 'nde lassas biu,  
tottu los as degogliados  
sos sacerdotes malvados  
chi a Bal adoraian.

Defende su peccadore...

Giurat de ti massacrare  
Jezabele infuriada,  
intendende s'ambasciada  
fuis, bramas ispirare,  
istraccu a riposare  
sutt' a s'albore sedias.

Defende su peccadore...

Su sonnu ti opprimesit  
e ti creden derelittu,  
s'anghelu cun cibu e vittu  
duas boltas t'ischidesit:  
"surge et comede" ti nesit,  
"grazias tibi" rispondias.

Defende su peccadore...

Pustis chi l'an lapidadu  
a Nabet in Israele,  
de s'impia Jezabele  
su maritu at allegradu  
e tue l'as minettadu  
in sa cittade de Samaria.

Defende su peccadore...

Su re cando idolatresit  
 profetas in su Carmelu,  
 fogu e pedras dae chelu,  
 pius de chentu 'nde brujesit  
 chi pro ti tenner mandesit  
 s'impiau re Ocozia.

Defende su peccadore...

Moisè est celebradu  
 chi passesit s'Eritreu;  
 tue, presente Eliseu,  
 su Giordanu as siccadu,  
 cun su mantu l'as toccadu  
 e s'abba si dividiat.

Defende su peccadore...

De malizia secundu  
 s'Anticristu det naschire,  
 s'isforzat a pervertire  
 a tottu cantu su mundu,  
 sende perversu e furibundu,  
 de prestigios iscriviat.

Defende su peccadore...

Pustis chi t'at trasportadu  
 in carru de fogu fulgente,  
 de nues gloria lughente  
 dae anghelos formadu  
 est fama t'appat portadu  
 ue Adamu abitaiait.

Defende su peccadore...

In custu altare sacradu  
 tue ascolta sos devotos,  
 ti ringrazian cun votos  
 a chie as esaltadu:  
 favoridu e amparadu  
 chie t'invocat 'nde siat.

Defende su peccadore  
 patriarca Sant' Elias.

**A Santa Ruche (3 maggio e 14 settembre)**

(Testo presente nelle raccolte Calvisi, Bulloni e in fogli sciolti)

O viv' arbore fiorida  
e misteriosa pianta,  
preziosa Rughe santa,  
arbore d'eterna vida.

Mistica arca de Noè  
contr' a sa tempesta amara,  
alta, prodigiosa e rara  
de su misticu Moisé,  
iscettru de s'eternu Re,  
bandera in altu estendida.

Preziosa Rughe santa...

Preziosa rocca forte,  
dizzosu monte sacradu  
ch' appas supra te piantadu  
sa bandera d'altu norte  
pro riscattare de morte  
e dare a s'omine vida.

Preziosa Rughe santa...

Monte prenu de tristura,  
de lagrimas e piantu,  
monte gloriosu tantu  
e pro s'anima dulzura,  
faghe in cudda die oscura  
ghia a s'anima perdida.

Preziosa Rughe santa...

O monte ch' as mereschidu  
portare cuddu altu Re,  
o monte sacru fioridu,  
o diccia appida in te,  
ue at patidu pro me  
sa morte non mereschida.

Preziosa Rughe santa...

Tronu eccelsu singulare  
de s'altu re Salomone,  
ue de sa redenzione  
sas tribù det giudicare,  
signu chi si det mustrare  
in cudd' ultima bennida.  
    Preziosa Rughe santa...

Vessillu d'alta milizia  
de cuddu divinu Marte,  
bandera d'altu istendarte  
contr' a s'umana malizia,  
vara d'eterna giustizia  
contr' a sa culpa omicida.  
    Preziosa Rughe santa...

Crae chi sola apperzesit  
sas portas de s'altu chelu,  
de su tempiu sacru velu  
dae testa a pes lompesit,  
libru inue s'iscriesit  
sa littera pius legida.  
    Preziosa Rughe santa...

Cattedra d'alta lezione,  
suprema iscola divina,  
cattedra d'alta dottrina,  
via de salvazione,  
portu de consolazione,  
d'ogni bonidade unida.  
    Preziosa Rughe santa...

Scala de Jacob sacrada  
tra chelu e terra suspesa,  
scala de anghelos mantesa,  
dae Deus a pala portada,  
de Davide arpa sonada  
cun tres craos guarnida.  
    Preziosa Rughe santa...



Lettu inue s'est dormidu  
cudd' anzone immaculadu,  
arbore su pius notadu  
de su pius fruttu notidu,  
arbore ue at fattu nidu  
s'ave de chelu bennida.

Preziosa Rughe santa...

Triunfu bellu gloriosu  
de tartarea ischiavitude  
e pro s'eterna salute  
astru singulare ermosu,  
nave de suave riposu  
in cudda estrema partida.

Preziosa Rughe santa...

Pianta eccelsa singulare,  
pianta preziosa e pia,  
tene custa cunfraria  
sutt' a s'umbra tua sacrada,  
tenela pro incumandada  
cuncorda e sempre unida.

Pianta vera connoschida,  
pianta de virtude tanta,  
preziosa rughe santa,  
arbore de eterna vida.

### A Santu Michelli (8 maggio e 29 settembre)

(Testo presente nelle raccolte Calvisi, Bulloni e in fogli sciolti)

Contr' a Lusbèl ambiziosu  
tenzestis valore tantu,  
Michelli Arcanzelu Santu,  
principe vittoriosu.

Gherra in campu de battaglia  
contrariu a Lusbèl formesit  
e a foras lu bettesit  
dae sa celeste muraglia,  
de sas de pius canaglia,  
cun impulsu poderosu.  
Michelli Arcanzelu Santu...

Ti desit Deus podere,  
forza, valore e potenzia  
a tale s'inobbedienza  
cun pena atroce moderes  
e chi lu sepultes cheret  
in s'inferru tenebrosu.  
Michelli Arcanzelu Santu...

Arrogante presumesit  
essere a Deus uguale:  
essende s'offesa tale,  
zegu de chelu ruesit  
e in s'istante perdesit  
su felicissimu gosu.  
Michelli Arcanzelu Santu...

Nonostante s'osadia  
de cuddu superbu Marte,  
lu sighesit sa terza parte  
de ognuna gerarchia,  
cando dognunu podiat  
tenner s'eternu reposu.  
Michelli Arcanzelu Santu...

In cuss' altiva invenzione  
cale unu Marte operestis,  
in generale lis destis  
s'eterna cundennazione,  
a sa tartara prejone  
los imbias fervorosu.

Michelli Arcanzelu Santu...

Fin tantos sos chi sighesin  
a cuddu Lusbèl superbu,  
chi de su divinu Verbu  
sos isplendores perdesin,  
e sos inferros cogliesin  
s'esercitu numerosu.

Michelli Arcanzelu Santu...

In cussu centru de penas  
pro sos perversos intentos  
istan patinde tormentos,  
fogu, fiammas e cadenas,  
pius chi non b'at arena  
in su mare procellosu.

Michelli Arcanzelu Santu...

Arcanzelu soveranu,  
pustis ch' as tantos onores  
faghe grazias e favores  
a su fidele cristianu,  
supostu ch' azis in manu,  
che principe generosu.

Già ch' in cussu chelu ermosu  
destis cun sa ghera ispantu,  
Michelli Arcanzelu Santu,  
principe vittoriosu.

## A Sant' Antoni 'e Padua (13 giugno)

### I

(Testo presente nella raccolta Calvisi e in fogli sciolti)

Sole de doradu mantu  
bestidu de risplendore,  
Antoni de Padua Santu  
sias nostru intercessore.

Pianta bella fruttuosa,  
pianta de s'altu oriente,  
pianta celeste vivente,  
pianta fecunda odorosa,  
viva istella luminosa  
de divinu risplendore.  
Antoni de Padua Santu...

Altu cipressu divinu  
in Lusitania piantadu  
in su giardinu sacradu  
de Franziscu serafinu,  
altu, bellu, virde pinu  
de dulce e suave odore.  
Antoni de Padua Santu...

Postu in sa religione  
de Franziscu patriarca,  
navighende in tale barca  
cun velas de orazione  
su portu de salvazione  
alcansestis cun amore.  
Antoni de Padua Santu...

In cussa barca assentadu  
navighende de continu,  
de s'altu Verbu divinu  
sezis bois visitadu:  
supra su libru doradu  
benzesit su Redentore.  
Antoni de Padua Santu...

Benin tottu a sa marina  
sos pisches de s'altu mare,  
pro t'intender preicare  
sa cattolica dottrina  
cun tanta grazia divina  
cuncessa de su Signore.  
Antoni de Padua Santu...

Tale donu singulare  
bos desit s'Onnipotente:  
ogni limba differente  
ischire in su preicare!  
Tottu bos den acclamare  
divinu predicatore.  
Antoni de Padua Santu...

Cando bos giaman de veras  
cun boghes duras penadas  
in cuddas penas sobradas  
sas lastimosas parteras,  
accudides a sas pregheras,  
succurrides sos dolores.  
Antoni de Padua Santu...

Cando benit a mancare  
prenda alcuna de valore,  
o Antoni intercessore,  
dades lughe a l'incontrare:  
tale donu singulare  
bos desit su Criadore.  
Antoni de Padua Santu...

Cando sos peregrinantes  
passan cun aversidade,  
e cando in sas tempestades  
bos giaman sos navigantes,  
faghidelos partecipantes  
de su celeste favore.  
Antoni de Padua Santu...

Cando alunu est accusadu  
de falsu crimen dolente,  
e cando alunu innozente  
est a morte cundennadu,  
servides de avvocadu  
e valente difensore.

Antoni de Padua Santu...

De s'altu amore infiammadu  
sa dottrina difendides,  
ereticos cunvertides  
de portentu secundadu:  
sezis semper acclamadu  
marteddu contr' a s'errore.

Antoni de Padua Santu...

Ite pius mannu portentu,  
cale ispantu de ammirare,  
de aer fattu adorare  
a sa mula su Sacramentu!  
Su tiranu intendimentu  
confusu at cun terrore.

Antoni de Padua Santu...

Cun tale doradu mantu  
e cun tantu risplendore  
ghiades su peccadore  
in custa valle de piantu:  
alleviadelu cun ispantu  
de ogni pena e dolore.

Antoni de Padua Santu...

Binchet sa forza *divina*  
s'eticu *impostore*,  
favores de tantu in *tantu*  
dimandan sos *peccadores*,  
de sa ecclesia gloria e *vantu*,  
portentu de su Signore.

Antoni de Padua Santu  
sias nostru intercessore.

## II

(Testo presente nelle raccolte Calvisi e Bulloni)

O cherubinu infiammadu,  
o Santu su pius famosu,  
Antoni meraculosu  
de Padua intituladu.

In Santos su pius santu,  
in prodigios e signales  
bene ti distinghes tantu  
chi t'ammiran sos mortales:  
remedia tottu sos males  
cando tue ses giamadu.

Antoni meraculosu...

Un'anghelu in forma umana  
t'avvisesit de repente  
chi a babbu tou portana  
a sa morte ingiustamente,  
ponzendeli falsamente  
s'omicidiu non pensadu.

Antoni meraculosu...

E a s'istante bolestis  
pro lu poder liberare,  
tue su mortu fattestis  
subitu in vida torrare,  
fattendeli cunfessare  
ch' isse già non fit istadu.

Antoni meraculosu...

Ite pius mannu portentu  
podias mai operare  
fachende su Sacramentu  
de una mula adorare,

.....

.....

Antoni meraculosu...

Ses de su mundu lugore,  
anghelu in su preicare,  
cun tanta grazia e favore  
chi sos pisches de su mare  
bessian pro t'iscultare  
postos dae gradu in gradu.

Antoni meraculosu...

Sos pisches de sa marina  
cumparian tottu impare  
pro t'intender preicare  
s'evangelica dottrina  
cun cudda grazia divina  
chi Deus t'aiat dadu.

Antoni meraculosu...

Pro esser tantu divinu  
Deus tantu t'istimesit  
ch' in figura de bambinu  
dae su chelu falesit  
e cun tegus s'abbrazzesit  
su Deus fizu umanadu.

Antoni meraculosu...

Cantu pius ti umilienstis  
in sa terra pellegrinu  
chi a su chelu bolestis  
supra d'ogni serafinu,  
ue istas de continu  
dae Deus esaltadu.

Antoni meraculosu...

De cantos t'an invocadu  
in ogni zittade e terra  
su rimediù ses istadu  
e sa paghe in ogni gherra:  
in su coro nostru inserra  
su nomen tou sacradu.

Antoni meraculosu...



Gemma de tottu sos Santos,  
corona de franziscanos  
ue accudin tottu cantos  
sos devotos cristianos,  
sos malaidos restan sanos  
comente an bidu e proadu.

Antoni meraculosu...

Su fogu, terra e mare,  
s'aera e dogni elementu  
bastat tue cumandare:  
t'obbidin a su momentu  
e t'ammirat cun portentu  
su mundu meravigliadu.

Antoni meraculosu...

Ispettamus alcansare  
cun sa tua protezione  
su favore singulare  
de sa nostra salvazione,  
lassende ogni occasione,  
ogni vizio, ogni peccadu.

Antoni meraculosu  
de Padua intituladu.

## A Santu Juanne 'e s'Ena (24 giugno)

### I

(Testo presente nelle raccolte Calvisi, Bulloni e in fogli sciolti)

Indice de su Divinu  
Verbu in sa terra umanadu,  
mustradenos su caminu  
de su chelu, Santu amadu.

Cale divinu curreu  
a su mundu precurrezis,  
e primu sas novas dezis  
a su populu giudeu  
chi s'altu fizu de Deu  
fit a sa terra abbassadu.

Mustradenos su caminu...

A bois Deus imbiesit  
curreu de su Messia,  
e tambene a Zaccaria  
un'anghelu anticipesit,  
su cale li rivelesit  
s'avventu 'ostru sacradu.

Mustradenos su caminu...

E pro ch' in custa imbasciada  
ponzesit alcuna duda,  
sa limba restesit muda  
de babbu 'ostru e ligada,  
ma bi l'azis isnodada  
appenas chi sezis nadu.

Mustradenos su caminu...

Mama 'ostra bos giamesit  
Giuanne cun nomen nou;  
Giuanne est su nomen sou  
Zaccaria l'iscriesit,  
pro chi s'anghelu bos desit  
custu nomen sublimadu.

Mustradenos su caminu...

De su divinu pianeta  
sezis lughe anticipada  
pro preparare imbiada  
sa plebe santa e perfetta,  
profeta e pius de profeta,  
o Santu privilegiadu.

Mustradenos su caminu...

Senza nascher abburrezis  
de gustare cosa immunda,  
a mama 'ostra fecunda  
sende isterile fatezis,  
in su sinu salutezis  
su Re celeste incarnadu.

Mustradenos su caminu...

Sende in su corpus maternu  
reclusu e ancora inserradu,  
bos at tando visitadu  
su matessi Verbu eternu,  
e cun risplendore internu  
restezis illuminadu.

Mustradenos su caminu...

Tres meses continuados  
Deus bos desit visitas,  
dendebos grazias infinitas  
e donos senza contados,  
paris paris battizados  
in su Giordanu sacradu.

Mustradenos su caminu...

Sende de edade minore,  
però no in pizzinnia,  
de sacra teologia  
bos dimustrezis dottore,  
connoschende su Signore  
de umana carre occultadu.

Mustradenos su caminu...

Inter tottu sos naschidos  
bois sezis su mazore,  
connoschezis su Signore  
cun tottu sa manu e didos,  
tottu sos donos unidos  
bos at Deus regaladu.

Mustradenos su caminu...

Appenas sezis naschidu  
e a su mundu iscobertu,  
tando prestu a su desertu  
cun presse sezis fuidu,  
ca su mundu azis timidu,  
pro cussu l'azis lassadu.

Mustradenos su caminu...

O profeta soveranu,  
martire tantu potente,  
boghe de s'Onnipotente,  
veru giustu eremitanu,  
dadenos bois sa manu  
in custu mundu intrincadu.

Mustradenos su caminu...

Bidende tantos favores  
chi Deus faghet a bois,  
bos amus elettu nois  
pro perpetu difensore,  
poderosu protettore,  
nostru celeste avvocadu.

Già chi sezis istimadu  
de s'altu Verbu divinu,  
mustradenos su caminu  
de su chelu, Santu amadu.

## II

(Testo presente nella raccolta Calvisi)

Già chi luches in s'arvore  
chin venerabile vista,  
Santu Giuanne Battista  
cherzas pro nois precare.

Sende in su sinu maternu,  
visitendebos Maria,  
destis cantos d'allegria,  
de gosu, giubilu e *vernu*,  
mirende su Verbu eternu  
de 'enner a ti visitare.

Santu Giuanne Battista...

Naschezis senza peccadu  
intro de su populu ebreu  
e battizesis unu Deu  
già fattu Verbu incarnadu:  
tantu tue as meritadu,  
pro portentu singulare.

Santu Giuanne Battista...

Mama tua ti giamesit  
Giuanne ch' est nomen nou;  
Giuanne est su nomen sou  
Zaccaria iscriesit,  
pro chi s'anghelu cherzesit  
su nomen tou esaltare.

Santu Giuanne Battista...

Tue ch' a su mundu as dadu  
lughe de sa lughe vera,  
chin boghe santa e sincera  
as a tottu annunziadu  
chi su Messia isettadu  
fit in terra pro abitare.

Santu Giuanne Battista...

De sos Santos su mazore  
in grandesa e dignidade,  
portentu de santidade,  
de sa fide difensore,  
tue istezis precursore  
pro gloria particulare.  
Santu Giuanne Battista...

Appena istesis creschidu  
e a sa terra iscobertu,  
ti 'nch' andas a su desertu  
dae Erode pesseghidu  
ca s'incestu proebidu  
li fis narende a lassare.  
Santu Giuanne Battista...

Ma fattu poi pius forte  
e caminende in tottue  
non ti miras pius tue  
sa pius barbara sorte,  
esponendeti a sa morte  
chin su tou predicare.  
Santu Giuanne Battista...

Ind' una prejone oscura  
Giuanne fit inserradu,  
crudu Erode affeminadu,  
pro soggezione dura  
d'una Erodiade ermosura  
ti fachtet decapitare.  
Santu Giuanne Battista...

Ses de su santu giardinu  
luna radiante e bella,  
ses astru, sole e istella  
chi lughes dogni manzanu,  
in prodigios soberanu  
e dignu de celebrare.  
Santu Giuanne Battista...

Luminosu pianeta,  
a tie imploramus tottu,  
custu populu divotu  
cun benignidade accetta,  
profeta de pius profeta,  
santidade de ammirare.

Santu Giuanne Battista...

Che patronu e protettore  
mustranos sa bella cara,  
defendenos e ampara  
e bocanos dae s'errore,  
mirendenos chin amore  
e zelu particolare.

Faghe de nos liberare  
de s'infernale conchista,  
Santu Giuanne Battista  
cherzas pro nois precare.

## A Santu Pretu (29 giugno)

### I

(Testo presente nelle raccolte Calvisi e Bulloni)

Finissimu diamante  
de celeste fortilesa,  
preda de fundamentu estesa  
de s'ecclisia militante.

Bessaida patria *oscura*,  
cittade de Galilea,  
zente de sa fide zega,  
dae su mare *bivesin*  
e inie *connoschesin*  
a Gesu Cristu regnante.

Preda de fundamentu estesa...

In sos discipulos tottu  
primu e caru confidente,  
in su Tabor assistente,  
in corte su primu votu  
e in s'ultimu abbolottu  
cumpagnu su pius costante.

Preda de fundamentu estesa...

Lassadu azis su piscare  
pro sighire su Signore,  
bos fattesit piscadore  
de animas in su mare,  
cun grazia particolare,  
de tottu su mundu errante.

Preda de fundamentu estesa...

Tantu fit su 'ostru ardore  
de bider su 'ostru amadu,  
chi bonche sezis bettadu  
in s'abba senza timore,  
bolende in alas de amore  
supra su mare incostante.



Preda de fundamentu estesa...

Cun poderes duplicados  
s'eclesia santa regides,  
ligades e isolvides  
s'omine isoltu o ligadu,  
sende in chelu confirmadu  
cun sentenza simizante.

Preda de fundamentu estesa...

S'esempiu 'ostru e dottrina,  
chi su mundu at illustradu,  
sos chelos at pienadu  
cun sa grazia divina  
de sa natura mischina  
chi fit zega e ignorante.

Preda de fundamentu estesa...

A Gesu Cristu imitende  
morzestis ind' una rughe,  
siazis a nois lughe  
in custu mundu vivente,  
infine, sende morzende,  
avvocadu in cuss' istante.

Preda de fundamentu estesa...

In sa testa de su *mare*  
Roma cattedra ponzesit,  
in Antiochia desit  
gherra pro *s'idolatria*,  
sa fide isse *prantaiat*  
de cristianu zelante.

Che in terra vigilante  
siades in cuss' altesa,  
preda de fundamentu estesa  
de s'eclesia militante.

## II

(Testo presente nella raccolta Calvisi)

Grande mastro avventurosu  
de sa fide e de su zelu,  
abberidenos su chelu  
Pedru apostulu gloriosu.

Fogu ses de santu amore  
pro Gesus tottu infiammadu,  
bives pro isse apparizzadu  
a morrer cun onore  
in su monte cun valore  
de su tristu ortu penosu.  
Abberidenos su chelu...

In sa notte desolada  
de sas tenebras infernales  
negas cun faeddu mortale  
a Gesus una mirada:  
format s'anima turbada  
longu piantu dolorosu.  
Abberidenos su chelu...

Maccari chi appas negadu  
su Signore pro tres bortas,  
cun tottu sa forza raccolta  
amore l'as protestadu:  
su gregge a tie donadu  
prontu pasches amorusu.  
Abberidenos su chelu...

Te' sas craes, aberi e serra  
de su chelu tue sas portas,  
ravviva s'anima morta,  
liga, isolve in chelu e terra  
de tottu s'imperiu afferra,  
lu faghet Deus poderosu.  
Abberidenos su chelu  
Pedru apostulu gloriosu.

## III

(Testo presente nella raccolta Calvisi)

Fundamentu assecuradu  
de sa cattolica fide,  
sos chelos nos abberide  
Pedru apostulu sacradu.

Su lumene de Simone  
s'est in Cefas cambiadu,  
dae mare giuliadu  
sighis sa vocazione,  
senza de dilazione  
tottu azis prestu lassadu.  
Sos chelos nos abberide...

In manos bostras sas craes  
de su chelu at intregadu,  
est in chelu perdonadu  
su ch' in terra perdonades,  
ei su ch' in terra ligades  
in chelu ancora est ligadu.  
Sos chelos nos abberide...

Pro divina illustrazione  
su Messia connottu azis,  
credizis e cunfessazis  
s'ipostatica unione,  
supra cussa cunfessione  
Deus sa fide at piantadu.  
Sos chelos nos abberide...

Pro difender su Signore  
s'ispada in s'ortu tirades,  
pagu a pustis lu negades  
pro effettu de timore,  
cun lagrimas de dolore  
pianghides custu peccadu.  
Sos chelos nos abberide...

In prejone orrenda oscura  
Erode bos at ligadu,  
un anghelu bos at salvadu  
abbassende dae s'altura,  
secande cadena dura  
l'at de pruntu liberadu.  
    Sos chelos nos abberide...

Cunvertidu at sa Somalia  
pustis de sa Galilea,  
gasi tottu sa Giudea  
e parte de s'Antiochia,  
abbattis s'idolatria  
ei sa fide bi as piantadu.  
    Sos chelos nos abberide...

Sos gentiles, sos paganos  
non podende prus soffrire  
sa conchista prosighire  
de miliones de cristianos,  
bos intregan in sas manos  
de s'inimigu magistradu.  
    Sos chelos nos abberide...

A Gesu Cristu imitende  
morgezis ind' una rughe,  
siazis a nois lughe  
in custu mundu vivente,  
a nois sende morentes  
protettore e avvocadu.  
    Sos chelos nos abberide  
    Pedru apostulu sacradu.

## A Santa Luchia (quarta domenica di giugno)

## I

(Testo presente nelle raccolte Calvisi, Bulloni e in fogli sciolti)

Santa sa pius esaltada  
supra d'ogni gerarchia,  
Virgine Santa Luchia  
siades nostra avvocada.

Luchia ch' istesis tale  
martire pro sa vittoria,  
a treichi de nadale  
gosas sa festa in sa gloria:  
pro chie t'at in memoria  
daeli grazia sublimada.

Virgine Santa Luchia...

Cando a Sant' Agata andestis,  
amorosa in sos affannos,  
a mama tua giutestis  
infirmas pro battor annos:  
prodigios sos pius mannos  
chi subitu l'as sanada.

Virgine Santa Luchia...

Dae sende criatura  
osservestis sa puresa  
pro tenner sempre segura  
de su chelu sa bellesa:  
naschida in nobilesa  
e morta martirizada.

Virgine Santa Luchia...

Barbaru Massiminianu,  
su crudele imperadore,  
a Pascasiu desit manu  
pro destruer dogni frore,  
e pro su tou candore  
a isposa t'at giamada.

## Virgine Santa Luchia...

Cale prodigiù *potente*  
 fattestis a sos *cristianos*  
 preighende a sos *tiranos*  
 in mesu a su fogu *ardente*,  
 ligada in pes e in *manos*  
 e tue senza brujada.

Virgine Santa Luchia...

Su ministru coraggiosu  
 s'arrischesit a su fogu,  
 fattende in sa braja logu  
 pro l'istruer animosa,  
 cun s'ispada velenosa  
 sa gula t'at trapassada.

Virgine Santa Luchia...

Inutilmente restesit,  
 tottu s'operare est vanu,  
 pro chi sa potente manu  
 de male ti liberesit;  
 limpia e pura restesit  
 a sa sede disizada.

Virgine Santa Luchia...

Tue ses veru portentù,  
 insigne in fortilesa,  
 contr' a s'umana fralesa  
 appidu as cumbattimentu:  
 cun sa vittoria as tentu  
 sa palma santa sacrada.

Virgine Santa Luchia...

Luchia ses vera lughe  
 ei su titulu 'nd' asa,  
 luce ch' a sos zegos dasa,  
 veru portu de salute:  
 a sa patria nos giughe  
 de sa vida avventurada.

## Virgine Santa Luchia...

Luchia ch' istesis cussa  
chi turmentos suffristis tantu,  
sa zittade de Siracusa  
si consumat in piantu  
ei s'Ìspiritu Santu  
t'at cun isse collocada.

Virgine Santa Luchia...

Cuddos chi t'an invocadu  
in sas fortes maladias,  
istesis tue, o Luchia,  
ch' a tottu salute as dadu,  
pro chi semper t'an portadu  
in su pettus preservada.

Virgine Santa Luchia...

Già chi potenzia tanta  
tenes in s'eccelsa gloria,  
tene a nois in memoria,  
Luchia Virgine Santa:  
ogni grazia nos alcansa  
cando tue ses giamada.

Già chi tantu coronada  
ses in sa sacra gloria,  
Virgine Santa Luchia  
siadenos avvocada.

## II

(Testo presente nella raccolta Calvisi)

Cale istella luminosa  
ch' illuminat sos mortales,  
dona remediù a sos males,  
Lughia Santa gloriosa.

Siracusa de Sicilia  
est sa patria tua dizzosa  
ue naschistis, bella rosa,  
d'illustrissima famiglia,  
cun ispantu e meraviglia  
istas pura e virtuosa.

Dona remediù a sos males...

De bellesa singulare  
t'at dotadu su Signore,  
pro eccessu de amore  
e donu particulare,  
de grazias unu mare  
t'at fattu prodigiosa.

Dona remediù a sos males...

Dae sa minore edade,  
a Gesus dae minore  
ti sacrificas, o frore,  
lizu de virginidade,  
in affettu e caridade  
allegra e meda gustosa.

Dona remediù a sos males...

Ses columna meda forte  
in sa fide, in sa puresa,  
no at potiu sa fieresa  
de tormentos ne sa morte  
cambiareti sa sorte,  
o Santa vittoriosa.

Dona remediù a sos males...



Dae Pascaziu presidente  
ses istada cundennada  
e isse ti at portada  
a logu d'infame zente:  
Deus t'at fattu potente,  
immobile, poderosa.

Dona remediù a sos males...

E de fogu circondada  
ti 'ides, o portentosa,  
cantas allegra e festosa,  
da isse no ses toccada,  
ti trapassat un'ispada  
in su collu furiosa.

Dona remediù a sos males...

Ispciale protettora  
de sa vista corporale,  
de su logu celestiale  
sias nostra protettora,  
in vida e in s'ultim' ora  
nos soccorre piedosa.

Ses in chelu poderosa  
pro sos poveros mortales,  
dona remediù a sos males,  
Lughia Santa gloriosa.

### A Santu Bonaventura (14 luglio)

(Testo presente nella raccolta Calvisi e in fogli sciolti)

Già chi sezis invocadu  
 cun pregarias e votos,  
 favoride sos devotos  
 Bonaventura sacradu.

Bidende tantu favore  
 chi Deus faghet a bois  
 bos amus elettu nois  
 pro perfettu difensore,  
 poderosu protettore,  
 nostru celeste avvocadu.  
 Favoride sos devotos...

Dottore pius eminente  
 non podimus agattare  
 de dottrina singulare,  
 dae pizzinnu de niente  
 in virtudes eccellente  
 dae Deus signaladu.  
 Favoride sos devotos...

Una criatura morta  
 senza gosare sa lughe  
 cun su signu de sa rughe  
 la torrezis a sa porta  
 in sa vida certas 'ortas,  
 sende cun fide invocadu.  
 Favoride sos devotos...

Non b'at forte calentura,  
 non b'at male nen dolore  
 chi non siat a onore  
 de Santu Bonaventura:  
 sa meighina sicura  
 Deus a bois at lassadu.  
 Favoride sos devotos...

Sende pizzinnu minore,  
però mannu in santidade,  
cun profunda umilidade  
apestis vanu timore  
de rezzire su Signore  
in bois sacramentadu.

Favoride sos devotos...

Ma cussu timore vanu  
bos lesit in cuss' istante  
su fidelissimu amante,  
Cristos bostru soveranu,  
istendendebos sa manu  
s'anghelu santificadu.

Favoride sos devotos...

Prudente, saviu e dottu,  
umile, mansu e modestu,  
anghelu terrestre onestu,  
castissimu, puru e dottu,  
caritativu e devotu  
de Maria signaladu.

Favoride sos devotos  
Bonaventura sacradu.

## A Sant' Anna (26 luglio)

## I

(Testo presente nella raccolta Calvisi)

Pro cudda bella aurora  
 chi ti naschesit in sinu,  
 cun Gesus, sole divinu,  
 sias Anna intercessora.

Cun prodigiù imperiale  
 d'esser mama consighesit,  
 a Maria cuncepesit  
 senza culpa originale,  
 de su serpente infernale  
 valente triumfadora.

Cun Gesus, sole divinu...

Cale istella mattutina  
 in te naschesit ridente,  
 pura, bella e innozente,  
 che rosa dae s'ispina  
 Maria mama divina,  
 de sas signoras Signora.

Cun Gesus, sole divinu...

Dae tottu sospirada  
 sa fiza tua Maria,  
 ch' est mama de su Messia  
 dae chelu decretada,  
 nos siat sempre avvocada  
 e mama consoladora.

Cun Gesus, sole divinu...

Isprecu de *sapienzia*,  
 de sas mamas esemplare,  
 vera mastra singulare  
 de castidade e *puresa*,  
 siat arca de *difesa*,  
 de ognunu protettora.

Cun Gesus, sole divinu...

Ses puru e candidu *lizu*,  
de bell' anima adornada,  
pro Maria ses istada  
de sa grazia *tesoro*:  
a nois sa grazia *insoro*  
dae mama e fizu implora.

Cun Gesus, sole divinu...

O cale celeste donu  
ti donat s'Onnipotente,  
cando tottu obbediente  
ti li prosta a su tronu:  
oh cantu Deus est bonu  
pro s'anima peccadora!

Cun Gesus, sole divinu...

Pro sas tantas allegrias  
chi persistin esser una,  
asculta a chie digiunat  
in sas duras agonias:  
cun Gesus e cun Maria  
assistidenos in cuss' ora.

Cun Gesus, sole divinu...

Minore ancora in edade  
tottu a Deus dedicata  
e subitu praticada  
grazia de sa divinidadade,  
un'adulta santidade  
bos faghet superiora.

Cun Gesus, sole divinu...

Sa corte celestiale  
a sa morte 'ostra dizzosa  
tott' assistit carignosa,  
festa format principale  
cun musica angelicale  
sa patria triunfadora.

Cun Gesus, sole divinu...

Un'anghelu ambasciadore  
annunziat de presente  
una fiza veramente  
mama de su Redentore,  
piena de perfettu amore,  
de grazias dispensadora.

Cun Gesus, sole divinu...

In su chelu collocada  
bos imploran sos mortales  
in sos partos e prus males  
de custa vida penada:  
a su chelu ses alzada  
pro nos esser difensora.

Ue est naschidu su Messia  
in Betlem bella aurora,  
cun Gesus, sole divinu,  
sias Anna intercessora.

## II

(Testo presente nella raccolta Calvisi)

Mama tottu ispeciosa  
piena de ardente zelu,  
prega pro nois in chelu,  
Anna Santa gloriosa.

Sezis Anna in nobilesa  
de sa prus eletta zente,  
ses che sole risplendente  
in sovrana bellesa,  
adornada de puresa,  
casta, bella e virtuosa.

Prega pro nois in chelu...

Isplendente aurora serena,  
sende in edade minore  
cresches cun grande fervore  
ca ses de grazias piena,  
ses de donos ricca vena,  
ses in numen graziosa.

Prega pro nois in chelu...

Ses pro cunsizu divinu  
a isposa destinada  
a sa virtude acclamada  
de s'amabile Giuachinu,  
de sa vida in su caminu  
ses istella luminosa.

Prega pro nois in chelu...

Ses isterile affligida  
e in edade avanzada,  
ma pro esser attirada  
a s'eternu tottu unida  
t'at formadu de Maria  
mama tottu ispeciosa.

Prega pro nois in chelu...

Oh cale celeste donu  
ti donat s'Onnipotente,  
cando tottu obbidente  
ti li prosta a su tronu!  
Oh cantu Deus est bonu  
cun s'anima virtuosa!

Prega pro nois in chelu,  
Anna Santa gloriosa.



**A Santu Jorgeddu 'e Dure (prima domenica di luglio)**  
(Testo presente nelle raccolte Calvisi, Bulloni e in fogli sciolti)

Mirabile protettore  
chi cun Deus podes tantu,  
o Giorgi Piscamu Santu  
de Sardigna risplendore.

In Casteddu ses cumparsu  
a sa lughe de su mundu,  
lizu candidu e giocundu  
chi tant' odore as ispartu,  
acclamadu, oh cale partu!,  
de santu celeste amore.

O Giorgi Piscamu Santu...

Celestiale cherubinu  
chi cumparis risplendente,  
ti declaras sorprendente  
de sa vida in su caminu  
e ti giaman serafinu  
sende in terra viadore.

O Giorgi Piscamu Santu...

In sa prima gioventude  
ses dae tottu ammiradu,  
anghelu in terra mandadu  
pro modellu de virtude,  
meigu de sa salute,  
fonte de ogni favore.

O Giorgi Piscamu Santu...

Preicadore famosu,  
dottore in divinidadade,  
giovaneddu in frisca edade  
fattu piscamu prodigiosu,  
tottu pro babbu amorosu  
ti giamana cun fervore.

O Giorgi Piscamu Santu...

Sa probatica pischina  
dae tottu est ammirada,  
mirat sa zente ispantada  
tanta virtude divina,  
incontrat sa meighina  
a s'affannu, a su dolore.

O Giorgi Piscanu Santu...

Ses sempre accumpagnadu  
de mirabiles portentos,  
t'obbidin sos elementos,  
sa morte t'at rispettadu,  
de s'inferru iscadenadu  
ses flagellu e ses terrore.

O Giorgi Piscamu Santu...

Fit su populu atturdidu,  
appianadu s'altu monte,  
aperinos ogni fonte  
pro sulleviu a su sidiu,  
su mortu as torradu a biu,  
su debile a su vigore.

O Giorgi Piscamu Santu...

Piantu cun confusione  
opprimit tottu sa zente,  
infestada crudelmente  
d'un'orribile dragone:  
bocchis cun s'orazione  
su mostru devastadore.

O Giorgi Piscamu Santu...

Ue est ruttu su serpente  
erba e terra est rubicunda,  
pro memoria de s'immunda  
bestia morta de repente:  
ancora ammirat sa zente  
su portentosu colore.

O Giorgi Piscamu Santu...

Cun portentu istrepitosu  
grande paghe as concludu,  
creschet s'albore floridu,  
su bastone prodigiosu,  
a s'errante, a su dudosu  
depones pruntu s'errore.

O Giorgi Piscamu Santu...

Pregas cun clamore forte  
chi una vittima immolada  
in vida siat torrada,  
e pronta obbidit sa morte,  
tantu in sa celeste corte  
ses potente intercessore.

O Giorgi Piscamu Santu...

Turchitoriu t'at giamadu  
in pranzu siat o chena,  
cun insoffribile pena;  
sende de pedra assaltadu,  
cun sa rughe as dissipadu  
s'esercitu infestadore.

O Giorgi Piscamu Santu...

Pro cussu riconnoschente  
cun beneditta Reina  
celebrende sa divina  
forza de s'Onnipotente  
a sa ecclesia prontamente  
donas ricchessa e onore.

O Giorgi Piscamu Santu...

Aronne sacrifichende,  
Mosè ses in sa potenzia,  
Geremia in s'eloquenzia,  
unu Paulu predichende,  
terribile riprendende  
cuddu duru peccadore.

O Giorgi Piscamu Santu...

O Santu tantu ammiradu  
de su populu cristianu,  
de su tronu soberanu  
ue regnas sublimadu  
a chie t'at invocadu  
dona s'eternu risplendore.

Mirabile protettore  
chi cun Deus podes tantu,  
o Giorgi Piscamu Santu  
de Sardigna risplendore.

**A su Sarvatore (6 agosto)**

(Testo presente nelle raccolte Calvisi, Bulloni e in fogli sciolti)

Dulce Gesus Salvatore  
pienu de benignidade,  
sos peccados perdonade  
a su tristu peccadore.

Deus d'immensa bonidade,  
de piedade e clemenzia,  
Deus eternu in essenzia,  
d'infinita bonidade,  
a sos peccadores dade  
su perdonu a dogni errore.  
Sos peccados perdonade...

Indignos azis amadu  
cun coro allegru e giocundu,  
deh! cunvertide in su mundu  
s'omine ch' est traviadu,  
deh! chi siat accettadu  
in su 'ostru santu amore.  
Sos peccados perdonade...

Re supremu soveranu  
de tottu sas criaturas,  
collide in cussas alturas  
ogni fidele cristianu,  
supostu ch' azis in manu  
ogni grazia, ogni favore.  
Sos peccados perdonade...

Babbu eternu poderosu  
de sa corte celestiale,  
liberadenos de male,  
dadenos veru reposu,  
in su regnu luminosu  
accettadenos Signore.  
Sos peccados perdonade...

Deus in chelu adoradu,  
omine in terra naschidu,  
pro redimere bennidu  
s'omine ch' est traviadu,  
cun custu nos azis dadu  
provas de su 'ostru amore.  
    Sos peccados perdonade...

Sende Deus immortale,  
in chelu e terra adoradu,  
pro amore nostru umanadu  
bos sezis fattu mortale  
e de su serpe infernale  
valente triunfadore.  
    Sos peccados perdonade...

Suspendide, eternu Deus,  
sa ira 'ostra e giustizia  
contr' a s'umana malizia  
de su peccadore feu:  
chi si cunfesset pro reu,  
confusu e cun disonore.  
    Sos peccados perdonade...

Sa 'ostra eterna grandesa  
mustrate in nos perdonare,  
pius che in castigare  
tanta nostra debilesa,  
e fachide chi difesa  
nos siat su 'ostru amore.  
    Sos peccados perdonade...

Immensu Deus in essenzia,  
immensu in suavidade,  
immensu in felicidade,  
immensu in sa clemenzia,  
immensu in sa presenzia,  
immensu in su lugore.  
    Sos peccados perdonade...

Già chi tantu nos amades  
senza chi lu mereschimus,  
su perdonu bos pedimus  
de sas nostras impiedades,  
pro chi de sas maledades  
sezis veru sanadore.

Cun prodigiù e amore,  
pienu de benignidade,  
sos peccados perdonade  
dulce Gesu Salvatore.

**A Sant' Austinu (28 agosto)**  
(Testo presente nella raccolta Calvisi)

Infiammadu serafinu  
de sa ecclesia difensore,  
gloriosu Sant' Austinu  
lughe de su peccadore.

Su divinu intendimentu  
chi ti disponet sa mente  
in mesu a barbara zente  
ti cuncedit naschimentu,  
ses de s' Africa ornamentu,  
de Tagarta ses s'onore.  
Gloriosu Sant' Austinu...

De Patriziu paganu,  
de Monica mama pia  
naschis tue, o vera ghia  
de su populu africanu,  
in sa zittade 'e Milanu  
ghettas nou risplendore.  
Gloriosu Sant' Austinu...

De penitenzia modellu,  
de orazione su tempiu,  
de penitentes esempiu,  
vera ghia de su chelu,  
senza maschera ne velu  
imitas su Salvatore.  
Gloriosu Sant' Austinu...

De ferrea voluntade  
ligadu fina a trint' annos,  
connosches sos disingannos  
de su mundu, falsidade,  
abbrazzas cun voluntade  
sa rughe de su Signore.  
Gloriosu Sant' Austinu...



Abbrazzas sa religione  
de su verdaderu Messia,  
depones sa frenesia  
manichea opinione,  
veru sustentu e bastone  
de s'eccllesia de su Redentore.

Gloriosu Sant' Austinu  
lughe de su peccadore.

A Sant' Istevene (quarta domenica di agosto)<sup>1</sup>  
(Testo presente nella raccolta Calvisi)

Dae Deus istimadu  
ses in Chelu poderosu,  
ses martire gloriosu  
Sant' Istevene sacradu.

Sende in edade minore  
a Deus ti ses offertu,  
'idias su chelu apertu  
cun su divinu Signore  
de celeste risplendore,  
de sos Santos esaltadu.  
Ses martire gloriosu...

Su martiriu affannosu  
as suffritu cun passenzia,  
cun docilesa e prudenzia,  
cumpassivu e amorusu,  
su pius santu dizzosu  
de Gesus sacramentadu.  
Ses martire gloriosu...

Sacru de grande lettura  
in su santu ministeriu  
ses martire de s'imperiu  
pro regnares in s'altura  
in sa lapide pius dura  
chi t'ana martirizadu.  
Ses martire gloriosu...

De ricchesas portentosu,  
de sa fide pius sinzeru,  
a destra a su Deus veru  
sacrariu maestosu,  
cun allegria e cun gosu  
in s'universu adoradu.

<sup>1</sup> Autrice Efisia Monni di Bitti.

Ses martire gloriosu...

De affannos consumidu  
primu martire celeste  
Deus dadu t'at sa 'este  
in su regnu benedittu,  
de virtudes arrichidu,  
de anghelos coronadu.

Ses martire gloriosu...

Sas grazias virtuosas  
tenes, de sa piedade  
t'at dadu sa Trinitade  
sa palma vittoriosa,  
de sa mente luminosa  
de patriarchas ornadu.

Ses martire gloriosu...

Sa divina Trinitade  
t'at premiadu in sa gloria,  
cun Gesus in sa memoria  
e Maria in castidade,  
in s'altura in santidade  
s'anima t'at collocadu.

Ses martire gloriosu...

Anima e corpus dizzosu,  
de sos martires recreu,  
lughente senza unu neu,  
de donos vittoriosu,  
protettore valorosu  
dae tottu ses bramadu.

Ses martire gloriosu...

Valorosu protettore  
sias in vida e in morte  
e in sa celeste corte  
nos difende difensore,  
accettanos cun amore  
a su postu disizadu.

Ses martire gloriosu...

Accettanos cun primura  
chi devotos t'invocamus  
e de t'ider ispettamus  
cun sa Reina de s'altura:  
dogn' anima siat pura,  
libera senza peccadu.

Ses martire gloriosu...

Sas precheras nos accetta  
chi devotos t'imploramus  
e pro cussu ti giamamus  
martire de sos profetas:  
sos peccadores ispetta  
a su regnu tantu amadu.

Ses martire gloriosu...

Martire tantu amadu  
de virtudes e puresa,  
de tottu sias difesa  
in sa valle de piantu;  
ti supplicamus intantu  
cun su coro umiliadu.

Ses martire gloriosu...

A Gesus e a Maria  
as offertu sa pessone,  
moveti a cumpassione  
in s'affannosa agonia,  
daenos perdonu e ghia  
comente t'amus precadu.

Nostru celeste avvocadu  
mustradi piaedosu,  
ses martire gloriosu  
Sant' Istevene sacradu.

A Santa Maria (8 settembre)<sup>2</sup>

## I

(Testo presente nelle raccolte Calvisi, Bulloni e in fogli sciolti)

Celeste vera allegria,  
bella e rara criatura,  
a sas supremas alturas  
incaminanos, Maria.

Dae sos primos momentos  
chi Deus tottu criesit  
e santamente formesit  
sos diversos elementos,  
in mesu a tantos portentos  
in mente eterna bivias.

A sas supremas alturas...

Mentras chi s'Onnipotente  
dat sa fatale sentenza  
pro sa disobbedienza  
d'Adamu primu parente,  
declaresit solamente  
in custa mama sa ghia.

A sas supremas alturas...

Pro si poder avverare  
cust' opera sorprendente  
unit Deus santamente  
Juacchinu e Anna impare,  
e gasi procurat dare  
fine a dogni profezia.

A sas supremas alturas...

De capidanni a s'otto  
naschesit s'alta Reina,  
salutare meighina,  
amparu de sos devotos:

<sup>2</sup> Di Ciriaco Mundanu, 1890.

accettadenos sos votos  
fattos cun pregadoria.  
A sas supremas alturas...

Appena appena naschida  
sos anghelos l'adorana  
e cun pompas la portana  
a s'immensidade unida,  
pro ch' istesit elegida  
a mama de su Messia.  
A sas supremas alturas...

De discendenza reale  
naschit custa verginella,  
lughente polare istella,  
cunfortu a dogni mortale:  
danos remediù a sos males,  
o dulce, benigna e pia.  
A sas supremas alturas...

Fin' a tres annos d'edade  
sa mama la guvernesit  
e de pustis l'offerzesit  
a Deus cun santidade,  
cumprinde cun umiltade  
su votu chi fattu aiat.  
A sas supremas alturas...

Fiza de s'eternidade,  
de Cristos mama dizzosa,  
de su veru amore isposa,  
fonte de benignidade,  
ispregu de santidade,  
de sos Chelos allegria.  
A sas supremas alturas...

Virgine tantu amorosa,  
Reina sa pius potente,  
consola s'afflitta zente,  
in sa vida procellosa

un'ojada piedosa  
bos dimandamus ebbia.

In sa die de agonia,  
die sa pius oscura,  
a sas supremas alturas  
incaminanos, Maria.

## II

(Testo presente nelle raccolte Calvisi, Bulloni e in fogli sciolti)

Grazias a s'altu Signore  
cantat dogni gerarchia  
pro chi est naschida Maria,  
mama de su Redentore.

Naschit lughes ostendende  
s'aurora misteriosa,  
cale vara prodigiosa  
portentos pronostichende,  
benefizios derramende  
a s'afflittu peccadore.  
Pro chi est naschida Maria...

Naschit giocunda e uffana  
formende in rajos donosos  
crepuscolos luminosos  
a sa redenzione umana,  
e cun grazia soverana  
a s'anima offerit favores.  
Pro chi est naschida Maria...

Naschit sa femina forte  
chi Salomone chirchesit,  
naschit sa chi reparesit  
sos istrazios de sa morte,  
naschit de sa eterna corte  
su doradu risplendore.  
Pro chi est naschida Maria...

Naschit sa fiza istimada  
de s'eternu Creadore,  
de su veru Redentore  
naschit sa mama ispettada,  
e naschit s'isposa amada  
de s'altu Consoladore.  
Pro chi est naschida Maria...



Naschit sa vara sagrada  
de s'istirpe de Jessè,  
naschit de s'eternu Ree  
sa prenda pius prezziada,  
Sunamitis trasformada  
cun disfrassos de amore.

Pro chi est naschida Maria...

Naschit s'aquila reale  
chi cun modos peregrinos  
ponet sos fizos bighinos  
a su Sole celestiale,  
naschende su manansiale  
de donos de su Signore.

Pro chi est naschida Maria...

Naschit sa Rachele ermosa,  
e naschit Lia fecunda,  
e naschit Sara giocunda,  
naschit sa Jael donosa,  
sa Debora poderosa,  
sa Giuditta de pius valore.

Pro chi est naschida Maria...

Naschit Ester figurada,  
naschit Rut ossequiosa,  
e naschit sa mezus rosa  
ch' est in Gerico piantada,  
e naschit predestinada  
Reina de ogni fiore.

Pro chi est naschida Maria...

Arrivat a portu sa nave  
de su mezus mercaderi  
ch' in movimentu ligeri  
nos portat pane suave  
cottu cun misteriu grave  
in fiamma de divinu amore.

Pro chi est naschida Maria,  
mama de su Redentore.

### A Nostra Signora 'e sa Pietate (15 settembre)

(Testo presente nelle raccolte Calvisi, Bulloni e in fogli sciolti)

Cun materna caridade  
sas supplicas ammittide,  
sos devotos favoride,  
Mama de sa Piedade.

Pro sas penas chi sentezis  
cando cun sa rughe a pala  
in mesu de zente mala  
a fizu 'ostru incontrezis,  
ue tantu lu 'idezis  
trattadu cun crudeltade.  
Sos devotos favoride...

Cantu dolore bos desit,  
affannu, pena e fastizu,  
cando a Giuanne pro fizu  
Cristos bos incumandesit  
e a isse consignesit  
sa nostra fragilidade.  
Sos devotos favoride...

A su Calvariu sichidu  
l'azis pro l'accumpagnare,  
inie crucificare  
crudelmente l'azis bidu:  
pro nois meda at patidu  
sa divina Majestade.  
Sos devotos favoride...

Cun tanta pena e margura  
cando in brazzos boll' an dadu,  
cando boll' ana leadu  
e postu in sa sepoltura,  
e bois, Virgine pura,  
restezis cun soledade.  
Sos devotos favoride...

Pro cudda pena e dolore  
ch' in su coro azis leadu  
cando mortu e inclavadu  
'idezis su Redentore,  
a sos tristos peccadores  
su perdonu l'alcansade.  
    Sos devotos favoride...

Pro tanta pena e dolore  
de su coro 'ostru amante  
favoride a ogni istante  
cuddos tristos peccadores,  
a mannos e a minores  
tottu cantos perdonade.  
    Sos devotos favoride...

Mamas chi fizo tenides  
e cun su coro istimades,  
affligida mi mirades  
ca motivu no ischides:  
benide, ca l'intendides,  
e su lamentu iscultade.  
    Sos devotos favoride...

Dogni cuntentu tenia  
cun mirare solamente  
fizu tantu obbidiente,  
fizu causa d'allegria,  
fizu chi sa tirannia  
sola at pottidu seppellare.  
    Sos devotos favoride...

Fizu tantu maltrattadu,  
fizu tantu pessighidu,  
nara populu attrividu  
ite dannu at causadu,  
o, ca ti at illuminadu,  
l'as cherfidu azzottare.  
    Sos devotos favoride...

Iss' est ch' at restituidu  
 a tantos turpos sa vista,  
 o ch' a fagher sa conchista  
 de animas est bessidu,  
 de purpura l'as bestidu  
 pro tinde cherrer beffare.  
       Sos devotos favoride...

Isse sustentu at donadu  
 d'abbundanzia a sos famidos,  
 cuddos meda cunsumidos  
 de maladias at curadu  
 e mortos resuscitadu,  
 e lu cheres cundennare.  
       Sos devotos favoride...

Mortales chi caminades  
 peri sas mattas e bias,  
 comente sas penas mias  
 simizantes 'nd' incontrades?  
 Nade chi no 'nd' agatades,  
 custa est sa veridade.  
       Meda liberalidade  
       in bois nos promittide,  
       sos devotos favoride,  
       Mama de sa Pietade.

**A Santu Mazzeu (21 settembre)**

(Testo presente nella raccolta Calvisi e in fogli sciolti)

Santu su pius signaladu  
in sas clemenzias de Deu,  
Sant' apostulu Matteu,  
evangelista sagradu.

De nazione galileu,  
in officiu publicanu,  
però mudesit sa manu  
s'onnipotenzia de Deu,  
cando a divinu impleu  
bos tenzesit destinadu.  
Sant' apostulu Matteu...

Su Signore poderosu  
piedosu bos at giamadu,  
cando pius imbarazzadu  
in custu mundu ingannosu  
cun pius prestesa e gosu  
l'azis tottu repudiadu.  
Sant' apostulu Matteu...

Sas funes de vanidade  
de ogni umanu tesoro  
chi tenen presu su coro  
in furias de iniquidade  
pro s'eterna veridade  
azis in breve truncadu.  
Sant' apostulu Matteu...

Cumbidu e festa parestis  
pro su divinu Signore,  
de su 'ostru grande amore  
gagliardas proas destis,  
pro Gesus tottu lassestis,  
a Gesus tottu intregadu.  
Sant' apostulu Matteu...

Lassestis senza rezelu  
sas ricchetas de su mundu,  
però logrestis giocundu  
sos tesoros de su chelu,  
pro chi su 'ostru desvelu  
fit a su chelu intregadu.  
Sant' apostulu Matteu...

Pro s' animosu valore  
cun chi su mundu lassestis,  
pro chi ardente vibrestis  
rajos de divinu amore,  
bos elegit su Signore  
a su sou apostoladu.  
Sant' apostulu Matteu...

Sa lughe azis rezzidu  
de cuddu sole increadu,  
e de su fonte sagradu  
abba abundante azis bidu,  
fistis de virtude bestidu,  
ramalettu preziadu.  
Sant' apostulu Matteu...

Aquila d' aguda vista,  
cherubinu addelentadu,  
in su mundu as molinadu  
pro fagher d' almas conchista,  
sezis primu evangelista  
e cronista sublimadu.  
Sant' apostulu Matteu...

S' evangeliu iscriestis  
cun Giuanne, Marcu e Luca,  
de sa zega zente turca  
aspros turmentos suffrestis  
pro chi sa gloria tenzestis  
de su Deus ch' azis amadu.  
Sant' apostulu Matteu...

S'evangeliu predichestis  
in Egittu ed Etiopia,  
dande lughe e vera ghia  
sos zegos illuminestis,  
cun portentos chi operestis  
azis sa fide piantadu.  
Sant' apostulu Matteu...

In religiosa clausura  
destis a Cristos isposas  
chi sun in chelu rosas  
de singulare ermosura,  
pro sas cales Deus in s'altura  
bos dat sogliu sublimadu.  
Sant' apostulu Matteu...

Cun sos egizios desertos  
su paradisu formana  
sos anghelos chi cantana  
cun mirabiles cuncertos,  
tottu sos chelos abertos  
t'ana tantu esaltadu.  
Sant' apostulu Matteu...

Cun mirabile portentu  
cuncurrin tott' a porfia  
sas aves cun melodia,  
sos colvos cun su sustentu  
de Lusbèl forte turmentu  
e de s'inferru infuriadu.  
Sant' apostulu Matteu...

Cun mirabile tersura  
coraggiosu che leone  
in cussas tetras presones  
chi veras fin sepolturas  
fistis ritratu e figura  
de su Verbu incarnadu.  
Sant' apostulu Matteu...

Unu Battista, unu Elia  
 ti depesin acclamare,  
 fistis ispregu singulare  
 de celestes gerarchias,  
 inter sas operas pias  
 meritestis su primu gradu.  
     Sant' apostulu Matteu...

In s'altare bos privesit  
 de sa vida unu buzzinu,  
 cun furore serpentinu  
 vinti lanzadas bos desit,  
 mortu su corpus restesit,  
 s'altare in samben bagnadu.  
     Sant' apostulu Matteu...

Cando a su chelu bolesit  
 s'anima 'ostra dizzosa,  
 Maria mama amorosa  
 cun sa fide t'abbrazesit,  
 pius de su sole ti desit  
 gloria in summu gradu.  
     Sant' apostulu Matteu...

Pro cudd' illustre vittoria  
 ch' in su mundu azis logradu,  
 pro su ch' azis alcansadu  
 in su chelu eterna gloria,  
 tenidenos in memoria  
 pro non ruer in peccadu.  
     Sant' apostulu Matteu  
     evangelista sagradu.



**A Santu Gorme e Santu Tomeanu (26 settembre)**  
(Testo presente nella raccolta Calvisi)

Bois tenides sa manu  
supra d'ogni infermidade,  
sos males nostros sanade,  
Santos Cosomo e Damianu.

In s'incostante elementu  
de sas abbas de su mare  
bos cherfesin annegare,  
ma cun insigne portentu  
bos ponet in salvamentu  
un'anghelu soveranu.  
Sos males nostros sanade...

Cuddas fiammas tantu ardentis  
d'unu furibundu fogu  
contr' a bois non an isfogu,  
sezis salvos reverentes,  
ma brujesin sos presentes  
ministros de su tiranu.  
Sos males nostros sanade...

A sas falsas deidades  
bos cumandesin d'amare,  
basciu pena de passare  
immensas barbaridades,  
penas e crudelidades  
ch' inventesit su paganu.  
Sos males nostros sanade...

Lissia pienu de furore,  
zegu privu de sa lughe,  
bos ponzesit tando in rughe  
pro odium de su Signore,  
e bois su disonore  
suffrezis cun coro uffanu.  
Sos males nostros sanade...

Sende in sa rughe incravados,  
 pedras, frizzas bos pioian,  
 però a bois non ferial  
 prite fizis preservados,  
 dae su chelu amparados,  
 de s'onnipotente manu.

Sos males nostros sanade...

Finalmente degogliados  
 cund' una crudele ispada,  
 sa corona suspirada  
 logrezis, affortunados,  
 e in chelu collocados  
 favorides su cristianu.

Sos males nostros sanade...

A bois tottu accudimus  
 pro dogni necessidade,  
 Santos mios remediade  
 tantos males chi patimus  
 ei su prus chi timimus,  
 perder a Deus soberanu.

Sos males nostros sanade...

Alta lughe preziosa  
 de risplendore divinu  
 chi dimustras su caminu  
 in notte pius oscurosa,  
 sa meighina sanadora  
 sezis d'ogni cristianu.

Sos males nostros sanade...

Custos frades luminosos  
 donat a su mundu Egea,  
 sa forte gherra e pelea  
 los coronat virtuosos,  
 sos tormentos prus penosos  
 Lissia proponet invanu.

Sos males nostros sanade...

Professione de meighina  
in Arabia esercitades,  
anima e corpus curades  
cun virtude alta divina,  
ponides tottu in ruina  
s'infernale capitano.

Sos males nostros sanade...

De calenturas mortales,  
de partos disisperados,  
moribundos, dolorados  
de incurabiles males,  
remedios celestiales  
a dognunu faghen sanu.

Sos males nostros sanade...

Su presidente odiosu  
de Gesus altu Signore  
bos arrestat cun rigore  
e cun modu lastimosu,  
interrogat maliziosu  
cun modu su prus insanu.

Sos males nostros sanade...

Bois però francamente  
sa ecclesia predichezis,  
sos tormentos disprezziezis  
cun furia prus ardente;  
sezis fertos prontamente  
cun modu su pius tiranu.

Oh rimediu soberanu  
de su mundu tottu cantu,  
meicos de grande vantu,  
Santos Cosomo e Damianu.

A Nostra Segnora 'e su Meraculu (30 settembre)<sup>3</sup>

I

(Testo presente nelle raccolte Calvisi e Bulloni)

Subra d'ogni gerarchia  
 dae Deus esaltada,  
 siadenos avvocada,  
 miraculosa Maria.

Fiza, mama, isposa amada  
 de sa Santa Trinitade,  
 piena de benignidade,  
 dae Deus preservada  
 dae ogni culpa malvada  
 de custa umana genia.  
 Siadenos avvocada...

Funtana celestiale  
 de signalados favores,  
 inue sos peccadores  
 an cunfortu a dogni male,  
 prite chi ogni mortale  
 succurrides, mama pia.  
 Siadenos avvocada...

Palma in Cades esaltada,  
 rosa in Gerico naschida,  
 pro dare a nois sa vida  
 dae s'Eternu ordinada,  
 in bois solu est serrada  
 ogni ricca poderia.  
 Siadenos avvocada...

De Sionne porta eletta,  
 dae Deus prezzada,  
 porta continu serrada,  
 senza macula cuncetta,

<sup>3</sup> Autore Sac. Francesco Loriga rettore di Gorofai, 1880.

sede de amore perfetta  
de su divinu Messia.  
    Siadenos avvocada...

Portu de salvazione,  
cittade de sicuresa  
contr' a sa nostra fralesa;  
tenet consolazione  
chie cun devozione  
sos sospiros bos inviat.  
    Siadenos avvocada...

De sa vida e de sa morte  
sas giaes azis in manu,  
pro cussu ogni cristianu  
bos giamat cun coro forte  
e li mudades sa sorte,  
lu colmades de allegria.  
    Siadenos avvocada...

Cando in mortale fastizu  
bos giamat cuddu affligidu,  
già prontamente s'at bidu  
resuscitadu su fizu,  
appaghende ogni disizu,  
iscansende ogni agonia.  
    Siadenos avvocada...

Cun su coro umiliadu  
bos supplicat fervorosa,  
muda cudda trist' isposa  
chi devota s'est portada  
a sos pes bostros prostada:  
sana in s'istante s'idiat.  
    Siadenos avvocada...

Benignamente iscultades  
chie bos at invocadu,  
e prontamente sanadu  
dae sas infermidades

afflittu lu consolades  
pro sa sua pregadoria.  
Siadenos avvocada...

Nessunu bos at giamadu  
in custa valle de piantu  
chi non siat cun ispantu  
dae bois consoladu,  
sentendesi aggrassiadu  
de cantu a bois pediat.  
Siadenos avvocada...

Annos sunu già tregentos  
chi bos mustrezis Segnora,  
benefichende a dogn' ora  
cun mirabiles portentos,  
faghende tottu cuntentos  
sos zittadinos de Andria.  
Siadenos avvocada...

Titulu de grand' onore  
bos desit s'Onnipotente,  
ca dae bois prontamente  
s'alcansat ogni favore,  
s'iscansat ogni dolore,  
s'ottenet ogni grassia.  
Siadenos avvocada...

Bos supplicamus Segnora  
cun profunda umilidade  
pro ch' in dogni aversidade  
nos siedas protettora,  
in vida e morte ancora  
siedas clemente e pia.  
Siadenos avvocada...

Sutta su mantu sacradu  
accoglide custa zente  
chi bos donat pro presente  
custu coro umiliadu,

cun giubilu cunsertadu  
e suave melodia.

Siadenos avvocada,  
miraculosa Maria.

II<sup>4</sup>

(Testo presente nelle raccolte Calvisi, Bulloni e in fogli sciolti)

De Cristos mistica isposa,  
 celestiale Segnora,  
 siadenos protetтора,  
 Virgine miraculosa.

Nada d'istirpe reale,  
 de David fiza diletta,  
 mirabilmente cuncetta  
 senza culpa originale,  
 de Cades palma immortale,  
 de Gerico eterna rosa.

Siadenos protetтора...

De donos senza misura  
 s'Eternu a bois dotesit,  
 chi suprema bos criesit  
 subra d'ogni criatura,  
 che virgine sa pius pura,  
 che mama sa pius dizzosa.

Siadenos protetтора...

Sezis divinu abitaculu,  
 de ogni grassia funtana  
 e cun rejone bos nana  
 Reina de su Meraculu,  
 d'Aronne floridu bacculu,  
 de virtude portentosa.

Siadenos protetтора...

Sezis desizadu portu  
 in s'agitadu oceanu,  
 ue dogni cristianu  
 incontrat solu accunortu,  
 ue bastante cunfortu  
 tenet ogn' alma penosa.

<sup>4</sup> Autore Ciriaco Mundanu, 1890.



Siadenos protettora...

Già dae seculos remotos  
sun immensos sos favores  
fattos a sos peccadores  
chi bos acclaman devotos,  
esaudinde sos votos  
cun forza misteriosa.

Siadenos protettora...

Muda cudda mama afflitta  
fit già su decimu mese  
e bos benit fin' a pese  
cun s'isposu, poveritta,  
dimandendebos cuntritta  
una grassia piedosa.

Siadenos protettora...

Costante sempre che rocca  
non lassat de bos giamare,  
non potende faeddare  
cun su coro bos invocat:  
appenas s'altare toccat  
faeddat, sana e festosa.

Siadenos protettora...

Cuddu babbu isfortunadu  
chi fizos no li campana,  
da una terra lontana  
at a Bois supplicadu,  
e bidu s'est circundadu  
d'una prole numerosa.

Siadenos protettora...

Mirade benignamente,  
taumaturga Reina,  
canta perversa dottrina  
turbat s'edade presente:  
mustrate maternamente  
sa via pius luminosa.

Siadenos protetтора...

Dae s'amenu orizzonte  
mustrate s'alta potenzia,  
abbattide s'insolenzia  
de su superbu Acheronte,  
tales chi s'infame fronte  
curvet bassa e birgonzosa.

Siadenos protetтора...

Cun astuzia disumana  
Satanassu iradu tentat,  
e cun mill' artes tormentat  
custa frale istirpe umana:  
fachide chi siat vana  
ogn' arte sua ingannosa.

Siadenos protetтора...

Contritos, umiliados  
bos pregamus cun fervore:  
dissipade ogni errore  
chi nos tenet traviados,  
guidadenos salvados  
in sa vida vittoriosa.

Siadenos protetтора...

In s'altu soliu divinu  
de sa mistica zittade  
sas preces nostras portade  
a su Deus unu e trinu,  
donade a dogni mischinu  
s'alta patria gloriosa.

In custa valle affannosa  
de sa vida in s'ultim' ora,  
siadenos protetтора,  
Virgine miraculosa.

## III

(Testo presente nella raccolta Bulloni)

Viva istella luminosa  
de s'universu allegria,  
preca pro nois, Maria,  
Virgine miraculosa.

In custa bella collina  
ses de grazias ricca fonte,  
tra chelu e terra ponte  
regnas in Bitti Reina,  
da su monte a sa marina  
t'invocamus portentosa.  
Preca pro nois, Maria...

De sos profetas disizu,  
de sos patriarcas brama,  
salve, affettuosa mama!  
fragrante candidu lizu,  
de Gesus, s'eternu fizu,  
mama, fiza amada isposa.  
Preca pro nois, Maria...

In su diluviu fatale  
arca de Noè sicura,  
figurada in s'iscrittura  
in cudda Ester regale,  
de s'Oloferne infernale  
Giuditta vittoriosa.  
Preca pro nois, Maria...

Cand' ispuntat s'aurora  
cantat sa soberania,  
cun suave melodia  
ti repetit a dogn' ora:  
«O suprema imperadora,  
de Gerico bella rosa».  
Preca pro nois, Maria...

Cando su sole brillante  
declinat a tramuntana,  
a tie, gemma galana,  
preziosu diamante,  
ti salodat esultante:  
«Palma de Cades maestosa!»  
Preca pro nois, Maria...

Perla fine orientale,  
de sas virgines oraculu,  
Reina de su miraculu,  
rimediu in dogni male,  
virga forte celestiale  
d'Aronne e Mosè famosa.  
Preca pro nois, Maria...

De David arpa diletta  
chi sanas ogni tristesa,  
sempre a chelu protesa  
de Giacob iscala eretta,  
Immaculada Cuncetta,  
de Anna fiza dizzosa.  
Preca pro nois, Maria...

De Iesse planta fiorida  
in custa valle de piantu  
sutta su maternu mantu  
difendenos in sa vida  
e in s'ultima partida  
nos accumpagna a sa losa.  
Preca pro nois, Maria...

Comente sa peregrina  
prontamente as risanadu  
cando s'altare at toccadu  
cun sa fiducia divina,  
s'anima nostra mischina  
nos salva, mama piedosa.  
Preca pro nois, Maria...

A su celeste bambinu  
chi tantu benigna mostras  
sas afflizioni nostras  
presentali de continu  
e a su portu divinu  
nos ghia, columba ermosa.  
Preca pro nois, Maria...

In sa virginale mente  
cunserva custos devotos  
chi cun generosos votos  
t'an fattu templu eminente,  
pro ch' in su tempus veniente  
t'onorent, mama amorosa.  
Preca pro nois, Maria...

Prostrados ti supplicamus  
pro tottu sos peccadores,  
in sos umanos errores,  
mama pia, t'invocamus,  
sa patria suspiramus  
pro ti 'ider gloriosa.  
Cantemus sa prodigiosa  
tottus cantos a porfia,  
preca pro nois, Maria,  
Virgine miraculosa.

A Nostra Segnora 'e Bonu Caminu (terza domenica di settembre)

I

(Testo presente nelle raccolte Calvisi, Bulloni e in fogli sciolti)

Cun celeste risplendore  
ses in soliu divinu,  
Virgin' e Bonu Caminu  
ghia de su peccadore.

Ses mama pia e clemente,  
de sas virgines Reina,  
efficace meighina  
pro s'afflittu paziente,  
Virgine dulce e potente  
pro su tristu viadore.  
Virgin' e Bonu Caminu...

Ses cunfortu poderosu  
de s'anima traviada,  
dae ognunu invocada  
contr' a Satana orgogliosu,  
chi solet invidiosu  
pervertire ogni candore.  
Virgin' e Bonu Caminu...

S'infelice navigante  
chi bramat su caru portu  
bidendesu mesu mortu  
in s'unda tumultuante,  
tenet salvesa in s'istante  
si t'invocat cun fervore.  
Virgin' e Bonu Caminu...

Ses s'astru pius lughente  
in su mundu burrascosu,  
ses su faru luminosus  
ghia de s'afflitta zente,  
cun manu dulce e potente  
calmas tue ogni dolore.

## Virgin' e Bonu Caminu...

S'affannosu peregrinu,  
in aspra via penende,  
a tie sola invochende  
torrat a bellu caminu,  
disposta a dare continu  
brazzu a mannos e minores.

Virgin' e Bonu Caminu...

Ses tue fiza diletta  
de sa Santa Trinitade,  
mama de s'Immensidade,  
isposa sa pius perfetta,  
de su Re de sos profetas  
divinu lustru e onore.

Virgin' e Bonu Caminu...

In s'alta protezione  
nois fidamus, Segnora:  
liberanos a dogn' ora  
d'ogni mala tentazione  
e in dogni occasione  
difendenos cun amore.

Virgin' e Bonu Caminu...

Mira, Segnora, sos males  
de custa ispinosa terra,  
ue terribile gherra  
momet su serpe infernale:  
faghe tue in modu tale  
chi perdat briu e valore.

Virgin' e Bonu Caminu...

Ave Segnora, ti namus  
cun coro umile e devotu,  
de sos peccadores tottu  
protettora ti giamamus,  
faghe chi bincher potamus  
su satanicu furore.

## Virgin' e Bonu Caminu...

Già chi nois como tantu  
potente ti conoschimus,  
una grazia ti pedimus:  
accoglinos in su mantu,  
raccumandanos intantu  
a su divinu favore.

Tene luntanu s'errore  
dae s'omine mischinu,  
Virgin' e Bonu Caminu  
ghia de su peccadore.



## II

(Testo presente nelle raccolte Calvisi e Bulloni)

Già chi ses miraculosa  
mama de su Verbu divinu,  
attendenos piedosa  
Maria de Bonu Caminu.

Ses mama consoladora  
chi disterrat sa tristura,  
in sa notte pius oscura  
ses bella, clara aurora,  
d'affliggidos protettora  
in dogni malu destinu.  
Attendenos piedosa...

Ses istella de su mare,  
de Gesus mama divina,  
de chelu e terra Reina  
supra tottu singulare,  
mama digna de laudare  
cun cantigu peregrinu.  
Attendenos piedosa...

Bos invocat, o Signora,  
su poveru navigante,  
su dudosu, su errante  
chi bos giamat protettora,  
bos invocat difensora  
su poveru peregrinu.  
Attendenos piedosa...

Dogni generazione  
chi bos acclamat, dizzosa,  
sende sa prus portentosa,  
digna d'ammirazione,  
digna d'adorazione  
dae ogni serafinu.  
Attendidenos Signora,  
Maria de bonu caminu.

## A Santu Franziscu (4 ottobre)

### I

(Testo presente nelle raccolte Calvisi, Bulloni e in fogli sciolti)

Padre de esemplu tantu  
ch' a tantos fizos as dadu,  
umile Franziscu Santu  
siades nostru avvocadu.

Sezis caminu divinu  
de s'afflittu peccadore,  
in forma de serafinu  
bos apparet su Signore,  
de celeste risplendore  
bos lassesit infiammadu.

Umile Franziscu Santu...

Sezis verdaderu sole,  
istella lughente e luna,  
sezis veru risplendore  
de tottu umana natura,  
sezis pura criatura  
de Cristos crucificadu.

Umile Franziscu Santu...

Padre de riccos favores,  
de minores fundamentu,  
amparu de peccadores,  
de sos demonios tormentu,  
de sos anghelos cuntentu,  
de Cristos innammoradu.

Umile Franziscu Santu...

Sas chimbe piagas sacradas  
de su Re de s'alta gloria  
in bois sun rinnovadas  
a perpetua memoria  
pro sa vida transitoria:  
sezis in chelu esaltadu.

## Umile Franziscu Santu...

Sos chi bos ana servidu  
in sa santa religione  
tenzan a Cristos unidu  
cun tottu sa passione  
pro lis dare remissione  
de ogni culpa e peccadu.

Umile Franziscu Santu...

Cun sos benujos in terra  
bos pregan, padre eccellente:  
liberadenos de gherra  
e de morte de repente,  
de pustis eternamente  
dadenos gosu sobradu.

Umile Franziscu Santu...

Sos marineris chi passan  
in su mare in tempestate  
in bois sempre alcansan  
portu de sicuridade:  
dade ghia e libertade  
a s'isclavu e tribuladu.

Umile Franziscu Santu...

Assistide sas parteras  
in cuddu estremu dolore,  
isolvide sas cadenas  
de sos chi son in prejone,  
dade consolazione  
a su ch' est inconsoladu.

Umile Franziscu Santu...

Sos de custa cunfraria  
chi bos portan su cordone  
bos pregan pro amore ebbia  
chi appan santisfazione  
su chi santu padre ponet  
de su peccadu attaccadu.

## Umile Franziscu Santu...

Pienu de divinu amore,  
padre de benignidade,  
de su peccadu ed errore  
perdonu nos alcansade,  
a sos devotos lis dade  
su chi bos ana pregadu.

Sezis su veru retrattu  
de Cristos crucificadu,  
umile Franziscu Santu  
siades nostru avvocadu.

II<sup>5</sup>

(Testo presente nella raccolta Bulloni)

Dessu misticu Arbòre  
 fruttuosa e ricca nae:  
 Santu Franziscu, nor dae  
 “paghe e bene” e santu amore.

Pro mustrare su caminu  
 chi Gristos at inzolau,  
 Franziscu ses mandau  
 dae Deus unu e trinu,  
 de Gristos in su zardinu  
 ses naschidu elettu fre.

Santu Franziscu, nor dae...

Fit tempus de tribulia  
 chi t'at dadu su natale,  
 pro sanare tantu male  
 benis, secundu Messia;  
 chei s'ozu de s'olia  
 tue das luche e calore.

Santu Franziscu, nor dae...

Dae su primu mamentu  
 a Zesusu ses simile,  
 ind' una istalla umile  
 as appiu naschimentu,  
 ti pones pro fundamentu  
 sa vida de su Signore.

Santu Franziscu, nor dae...

Ma in Santu Damianu  
 ti faveddat Zesù Gristu:  
 «lassa custu mundu tristu,  
 salva su genere umanu».  
 Ass'amore soberanu

<sup>5</sup> Gosos in limbazu nugoresu, fattor dae su pride Franziscu Lostia de Oroteddi.  
 2/8/1956, festa de su perdonu de Assisi.

ti cussacras chin ardore.  
 Santu Franziscu, nor dae...

Pro sa santa relizione  
 abandonas cumpanzias,  
 ricchetas e allegrias  
 chin sas vanas passiones;  
 contr' a babbu Bernardone  
 su piscamu ar defessore.  
 Santu Franziscu, nor dae...

Er Zesusu chi t'imbiat  
 pro ti fagher sos balanzos,  
 muttir doichi cumpanzos  
 assa bida santa e pia:  
 fundas una cunfraria  
 d'umiles frader minores.  
 Santu Franziscu, nor dae...

Su pontifice romanu  
 in su sonnu ti bidiat  
 sor muros de sa cresia  
 mantenende in Lateranu;  
 su chelu t'at dadu manu  
 pro 'nche benner binchidore.  
 Santu Franziscu, nor dae...

Sos puzones dess'aghera  
 t'iscurtana preicande,  
 e andas ammasetande  
 de su buscu cudda fera;  
 sa ruche mustras pandera  
 contr' ass'infernale errore.  
 Santu Franziscu, nor dae...

Assu mundu facher gherra,  
 Gristos amande a deliriu;  
 pro rezzire su martiriu  
 chircas sas paganas terras,  
 ma assas nadias serras

‘nche ghiras preicadore.  
Santu Franziscu, nor dae...

Dae sa nobilitade  
si ‘nche fughit Santa Crara,  
chircande sa prenda rara  
t’addobiat comente frade,  
tue de sa Trinitade  
mustras s’eternu lucore.  
Santu Franziscu, nor dae...

Nostra Segnora Maria  
t’at meritau, pro donu,  
“de Assisi su perdonu”  
assa tua cufraria,  
e ghirat da s’ingannia  
pentiu su peccadore.  
Santu Franziscu, nor dae...

De Cristos sichis s’ormina  
tra montes e roccas rudes,  
sar framas de gioventude  
domas in mesu de ispinas,  
pro sas grassias divinas  
su rubu bestis de frores.  
Santu Franziscu, nor dae...

In sor buscos e canales  
de s’Alvernia in sas alturas  
pedis eterna pastura  
pro sos poveros mortales,  
e de Cristos sos sinzales  
rezzis tra milli lampores.  
Santu Franziscu, nor dae...

E crumpis sa passione  
cantande in puntu e morte  
at Assisi in bona sorte  
sa tua orassione;  
como custa nassione

ti connoschet protettore.  
 Santu Franziscu, nor dae...

De sa terra 'e sos nuraches  
 fache a Cristos su sacrariu  
 e da custu santuariu  
 tra sos montes e fundaches  
 assos sardos dias pache,  
 o Santu mereschidore.  
 Santu Franziscu, nor dae...

O prus santu tra sos Santos  
 tene a contu sos devotos  
 chi ti battini sor votos  
 o t'offerini sos prantos,  
 remedia a tottu cantos  
 sa margura e su dolore.  
 Santu Franziscu, nor dae...

Tene allargu sas tempestas,  
 sor dannosos temporales,  
 sar rughinas e sor males,  
 tottu sar gherras funestas,  
 d'abbundanzia facan festas  
 su massaju e su pastore.  
 Santu Franziscu, nor dae...

Tottu potana lograre  
 su chi juchene in su coro,  
 ch' in sa bidde de Nugoro  
 tottur benzana a pregare:  
 a sar festas tott' impare  
 torren fachendeti onore.  
 Santu Franziscu, nor dae...

Su cumandu a nos amare,  
 su saludu "pache e bene"  
 da mont' Arbu a s'Ortobene  
 e su monte de Gonare,  
 dae sa terra e dae su mare



bolen assu Redentore.

Ser de Gristos bandidore,  
de sa cresia forte trae:  
Santu Franziscu, nor dae  
“paghe e bene” e santu amore.

A Santa Soffia (seconda domenica di ottobre)

(Testo presente nella raccolta Calvisi)

Ses a sa 'oghe *divina*  
fidele e corrispondente,  
Soffia pro nois *implora*  
grazias de s'onnipotentente.

Nere est innamoradu  
de tue candida rosa,  
onores de vera isposa  
t'at offertu e presentadu,  
pattu unicu dimandadu  
pro una paghe permanente.  
Soffia pro nois implora...

Ca sa manu l'as *negadu*  
t'at in prejone portada  
e suffris umiliada;  
pro s'eternu *Redentore*  
su terrenu *imperadore*  
ricusas costantemente.  
Soffia pro nois implora...

Custa eroica firmesa  
ti costat sambene e vida,  
ti presentas a s'isfida  
cun coraggiu e fortilesa,  
virginidade e puresa  
difendes mirabilmente.  
Soffia pro nois implora...

E non t'ispantan sas cadenas  
e fragellos inumanos,  
sas freccias de sos tiranos  
divinamente refrenas:  
ind' unu mare de penas  
ispiras, columba innozente.  
Soffia pro nois implora...

Appenas t'an interrada  
cun segreta diligenza,  
pro divina providenzia  
su corpus s'est incontradu,  
su sambene at dimustradu  
variedade sorprendente.  
Soffia pro nois implora...

Su nomen tuo famosu  
in breve s'est dilatadu,  
t'invocat s'isconsoladu,  
ti consultat su dutosu,  
cunvertis in veru gosu  
su prus funestu accidente.  
De s'inimigu *infernale*  
difendenos fortemente,  
Soffia pro nois *implora*  
grassias de s'onnipotente.

**A sa Beata Vergine 'e Bonaera (seconda domenica di ottobre)**  
(Testo presente nelle raccolte Calvisi, Bulloni e in fogli sciolti)

In su divinu tribunale  
siadenos protettora,  
de Bonaera Signora  
remediade sos males.

Maria, fiza diletta  
de s'Onnipotete trinu  
e de su Verbu divinu,  
ses pura mama concetta,  
ses casta virgine netta  
de sa culpa originale.

De Bonaera Signora...

Ses casta virgine pura  
d'originale peccatu,  
sa potenzia t'at datu  
su Supremu de s'altura,  
grazias senza misura  
tenes cun donos totales.

De Bonaera Signora...

Sa celeste imperadora  
s'incaminat a su mare  
cun su fizu a liberare  
ogn' anima peccadora  
che rutilante aurora  
chi ghiat ogni mortale.

De Bonaera Signora...

A mesanotte isportada  
s'onnipotente Reina  
s'aera at mutadu grima,  
sa tempesta est reparada,  
sas undas sun applicadas  
de su grande temporale.

De Bonaera Signora...

In s'abba naufragante  
applacada est sa tempesta,  
reparas cun manu destra  
sas undas esorbitantes  
ca a dogni navigante  
ses mama ispirituale.

De Bonaera Signora...

Ghias dogni bastimentu  
sende su mare agitadu,  
sos chelos as istelladu  
dae s'altu firmamentu,  
reparadu as d'ogni ventu  
de sa tempesta fatale.

De Bonaera Signora...

Miraculos evidentes  
as fattu in terra e in mare,  
accudit a t'incontrare  
innumerabile gente,  
ma sa grazia solamente  
a sos padres mercediales.

De Bonaera Signora...

No appende iscrizione  
su nomen tou assentadu,  
a su celeste retrattu  
Bonaera li disponen,  
portada in devozione  
a su cumbentu reale.

De Bonaera Signora...

Mutadu at grima s'aera  
dae cattiva esalada  
e pro cussu ses giamada  
Reina de Bonaera,  
capitana e marinera  
de barca fundamentale.

De Bonaera Signora...

Remediu pro lis dare  
 t'invocan ogni mamentu,  
 mudos senza intendimentu  
 faghès in s'attu faeddare,  
 toppos senza caminare  
 curas senza ispeziale.

De Bonaera Signora...

In necessidade estrema  
 t'invocan sas partorentes,  
 sun salvadas prontamente  
 de sas affannosas penas  
 sas prus preziosas gemmas  
 de su Re celestiale.

De Bonaera Signora...

Reina tantu eccellente  
 inter tottu sas reinas,  
 de sos males meighina  
 chi curas perfettamente,  
 imperatrice potente  
 de sa corte celestiale.

De Bonaera Signora...

Mama de sos affligidos,  
 s'universale barchera,  
 dimandan ghia libera  
 paraliticos, bandidos,  
 sos prus coros induridos  
 accudin pro t'adorare.

De Bonaera Signora...

Su nomen tou reclamati  
 in terra ogni passizeri  
 e ses de sos marineris  
 sa potente soverana,  
 ses cale guida, mama,  
*portentos misteriales.*

De Bonaera Signora...

Ses cale, mama, guida,  
de sos fizo vigilanzia,  
in Maria est s'isperanzia  
de nos consolare in vida  
e de s'eterna partida:  
tuta su fogu infernale.

De Bonaera Signora...

Tuta s'infernale gherra,  
mama de summu regelu  
in s'altura e in su chelu,  
in s'altura e in sa terra,  
porta Maria non serrat  
a s'anima liberale.

In s'altura celestiale  
su perdonu nos implora,  
de Bonaera Signora  
remediade sos males.

**A Babbu Mannu (terza domenica di ottobre)<sup>6</sup>**  
 (Testo presente nella raccolta Calvisi e in fogli sciolti)

Cun fideles intenziones  
 e cun tottu su esser meu,  
 credo ind' unu solu Deu  
 in tres distintas persones.

Est unu Deus in essenzia,  
 trinu in personalidade,  
 uguale in majestade  
 e gasi in s'onnipotenzia,  
 uguale in s'eminenzia,  
 uguales perfessiones.

Credo ind' unu solu Deu...

Non tenet prioridade  
 de tempus nen de natura  
 pro chi est Deus in s'altura  
 ente pro aseidade,  
 a se e per se deidade  
 digna de adorassione.

Credo ind' unu solu Deu...

Su Babbu est prinzipiu eternu  
 de sas atteras persones,  
 sun uguales perfessiones,  
 unu Deus sempiternu,  
 causa prima e governu  
 de sas nostras aziones.

Credo ind' unu solu Deu...

Istat su Babbu mirende  
 sas suas perfessiones,  
 sa segunda in sas persones  
 semper istat ingendrende

<sup>6</sup> Custos gosos sunt istados cumpostos dae su dottu teologo Giuanne Arca de Bitti e inoghe probanu dae s'annu 1545 a su 1588.



transustanziales formende  
divinas relaciones.

Credo ind' unu solu Deu...

Ab eternu cun ispantu  
su Babbu ingendrat su Fizu,  
ambos cun summu cunsizu  
ispiran s'Ispiritu Santu,  
dulce visu, suave incantu  
d'increadas perfessiones.

Credo ind' unu solu Deu...

Individua Trinitade,  
individu esser divinu,  
veru Deus unu e trinu  
e trinu in summa unidade,  
simplicissima entidade  
in diversas cunceziones.

Credo ind' unu solu Deu...

Infocados serafinos,  
rajos d'alta caridade,  
celebrade, celebrade  
sos misterios divinos,  
sos portentos peregrinos  
cun mutuas acclamassiones.

Credo ind' unu solu Deu...

Già chi cattolicu sese  
cree senza imbargu nessuno  
su Deus ch' est trinu e unu,  
est tambene ind' unu tres,  
sa cattolica fide et les  
mandat custas perfessiones.

Credo ind' unu solu Deu...

Padre trinu onnipotente,  
Verbu eternu salvadore,  
Ispiritu Santu d'amore,  
fiamma accesa perpetuamente,

dade a custa 'ostra zente  
divinas ispirassiones.

Credo ind' unu solu Deu...

Alta, divina potenzia,  
profundamente t'adoro,  
a tie do mente e coro  
cun firmissima credenzia,  
indivisibile essenzia,  
o summa perfezzione.

Credo ind' unu solu Deu...

Già chi cun devotu cantu  
clamat su nostru disizu,  
in nomen de Babbu e Fizu  
e de s'Ispiritu Santu  
mandadenos intertantu  
divinas consolassiones.

De tottu sas nazione  
sezis consolu e recreu,  
credo ind' unu solu Deu  
in tres distintas persones.

## A Nostra Signora 'e sa Defessa (quarta domenica di ottobre)

## I

(Testo presente nelle raccolte Calvisi e Bulloni)

De su chelu sos favores  
liberale nos dispensa:  
Reina de sa Defensa  
ampara su peccadore.

Ses Reina de piedade,  
ghia de sos afflittos, mama,  
in su chelu eterna fama  
ti publican generale:  
a tottu de ogni male  
defende cun vivu amore.

Reina de sa Defensa...

Mama de vida e dulzura  
e d'isperanza piena,  
de sa culpa e de sa pena  
perdonu nos assicura,  
pro ch' in sa gloria ventura  
gosemus su Criadore.

Reina de sa Defensa...

A sos tristos disterrados  
in custa valle de piantu  
grazias nos cuncedi tantu  
chi restemus consolados  
e de pustis collocados  
in sa patria superiore.

Reina de sa Defensa...

Ave Giuditta valorosa,  
de sas animas amparu,  
de su Oloferne avaru  
destriera vittoriosa:  
salva s'anima dizzosa  
de s'infernale furore.

Reina de sa Defensa...

In su tempestosu mare  
de su peccadu annegados  
supplicamus umiliados  
sa manu nos cherzas dare  
e in postu assicurare  
de perdonu cun fervore.

Reina de sa Defensa...

Mira, benigna Segnora,  
sos peccadores cuntrittos,  
alleviu de sos afflittos  
ses mama consoladora:  
cuncede, bella aurora,  
de sas grassias su lugore.

Reina de sa defensa...

Mama vera de piedade,  
a s'anima senza fruttu  
dali su salvaconduttu  
de virtude e santidade,  
dali segura amistade  
cun su amante Redentore.

Reina de sa Defensa  
ampara su peccadore.

## II

(Testo presente nella raccolta Bulloni)

In s'ora de s'agonia  
mira a nois cun amore:  
ampara a nois, Maria,  
difende su peccadore.

Virgine privilegiada  
de s'altu Verbu divinu,  
vera ghia, lughe e caminu  
de s'anima tribulada  
ses Virgine immaculada  
mama de su Redentore.

Ampara a nois, Maria...

De sos Santos ornamentu,  
de sos anghelos patrona,  
de! cun fervore matrona,  
gloria de su firmamentu,  
de patriarchas cuntentu,  
gloria de sos cunfessores.

Ampara a nois, Maria...

De sos anghelos Reina  
e de sos Santos Segnora,  
de omines protettora,  
de tesoros ricca mina,  
dispensadora divina  
de grazias e favores.

Ampara a nois, Maria...

De s'anima penitente  
ses consolu e allegria,  
ses caminu e beadia  
de sa prus confusa mente,  
mama piedosa e clemente  
ses tue digna de amore.

Ampara a nois, Maria...

Est mama de Deus Maria  
sa Defessa intitulado  
pro esser issa avvocada:  
difende s'anima mia  
in s'ora de s'agonia  
de s'inimigu traitore.  
Ampara a nois, Maria...

Ses sa nostra intercessora,  
de su chelu sa belles,  
celestiale princesa  
de su mundu regnadora,  
de sa morte in s'ultim' ora  
cuncedinos su favore.  
Ampara a nois, Maria...

O Virgine prodigiosa,  
a sos divotos alcanza  
firma fide e isperanza,  
caridade fervorosa,  
penitenzia fruttuosa  
de sas culpas ed errores.  
De su chelu *s'ermosura*,  
de su mundu su primore,  
ampara a nois, *Maria*,  
difende su peccadore.

## A Nostra Segnora 'e sas Grassas (21 novembre)

## I

(Testo presente nelle raccolte Calvisi e Bulloni)

Benner, mama, bos bidimus  
lughente cale aurora:  
grazias damus e pedimus,  
grazias, de Grazias Segnora.

Tesoro occultu e sacradu  
bos veneran e predicat  
s'iscrittura, bos publican  
chi sezi mare pienadu  
de ogni bene ch' azis dadu  
e nos dades a dogn' ora.  
Grazias damus e pedimus...

Cussu retrattu divinu  
est fattu senza uguale  
pro su mundu universale  
dae pinzellu peregrinu,  
ammiradu est su pius finu  
de arte superiora.  
Grazias damus e pedimus...

In annos calamitosos  
pienos de grande agonia  
benides, vera allegria,  
cun ojos bellos piedosos:  
a sos chi benin ghesciosos  
siades consoladora.  
Grazias damus e pedimus...

Ligades sas voluntades,  
innamorades sa zente,  
sempre pia e clemente  
a dogn' ora nos mirades,  
cun grazias cumpensades  
sas visitas, o amadora.

Grazias damus e pedimus...

Tue ses portu securu  
in su tempestosu mare,  
ses porta celestiale  
e centru d'amore puru,  
ti figurat forte muru  
sa sapienzia ancora.

Grazias damus e pedimus...

In cussu ermosu sacrariu,  
sutta cristallu e cortina,  
cun assistenzia divina  
restas de grazias summariu,  
singulare santuariu  
e de Bitti protettora.

Grazias damus e pedimus...

Grazias rezzin sos dolentes,  
grazias rezzin sos sanos,  
sas grazias t'andan in manos  
cun prodigios evidentes,  
mannos, pizzinnos, ausentes  
favoris, bella aurora.

Grazias damus e pedimus...

Sa divina onnipotenzia  
contr' a nois indignada  
la placas, l'as disarmada  
cun sollecita frequenzia:  
ses mama de sa clemenzia  
in sa patria triunfadora.

Grazias damus e pedimus...

Dae tottu sa Sardigna  
t'offerin rikkos tesoros,  
chie non podet sos coros  
ti raccumandat o impignat:  
o mama dulce e benigna,  
perdonu dona e implora.



Grazias damus e pedimus...

Bidimus, Signora amada,  
chi benides novamente  
e miraculosamente  
restades bene agattada,  
dae tottus venerada  
pro unica difensora.

Grazias damus e pedimus...

Custos maternos affettos  
ch' in su pettus inserrades  
cun nois los dimustrades,  
fizos vostos prediletto:  
pro chi siamus perfettos,  
su coro nostru infervora.

Grazias damus e pedimus...

Già chi tantu nos amades  
e gasi nos favorides,  
sos devotos accoglide  
sutta su mantu e salvade,  
e pustis los trasportade  
a su Sion, coronadora.

A bois sempre accudimus,  
o de grazias dispensadora,  
grazias damus e pedimus,  
grazias, de Grazias Signora.

## A Sant' Antiocu (seconda domenica di novembre)

### I

(Testo presente nella raccolta Calvisi e in fogli sciolti)

Palma de tantu valore  
de firma fide cumprida,  
meicu santu de vida,  
Sant' Antiocu dottore.

In Calabria abitende  
fis perfettu cristianu,  
s'imperadore regnende  
crudele Dioclezianu,  
chi fit su pius tiranu  
contr' a Cristos Redentore.  
Meicu santu de vida...

Fistis de sas meighinas  
meicu in tottu sos males,  
fachende curas divinas,  
sanende piagas mortales,  
curende infirmitades  
cun caridade e amore.  
Meicu santu de vida...

S'imperadore crudele  
s'idolatra Adrianu,  
rabbiosu e infidele  
persighit su cristianu,  
forzende in modu inumanu  
chi neghet su Criadore.  
Meicu santu de vida...

Medas tormentos ti desit  
pro ti fagher idolatrare,  
a su fogu ti bettesit  
pro ti fagher brujare:  
restas, in tantu penare,  
illesu senza dolore.

Meicu santu de vida...

Sos idolos ti mustresin  
pro los poder adorare,  
dispressiados istesin  
senza los cherrer mirare  
e los fattestis istare  
confusos cun disonore.

Meicu santu de vida...

Tottu allegros e cuntentos  
sos inimigos ti desin  
sos pius crudeles tormentos:  
a leones ti bettesin,  
ma custos ti rispettesin  
pro grazia de su Signore.

Meicu santu de vida...

Pustis chi tantos turmentos  
cun costanzia as superadu,  
sos barbaros, non cuntentos,  
in esiliu t'an mandadu,  
ind' un'ischiffu bettadu  
ti an a mare cun furore.

Meicu santu de vida...

Senza aiutu e forza umana  
partis allegru e festosu  
pro defender coraggiosu  
s'alma fide cristiana:  
in s'isula Sulcitana  
ti portesit su Signore.

Meicu santu de vida...

Zegos e istroppiados  
d'ogni male differente  
t'invocan continuamente  
a sos pes umiliados  
e sinde partin sanados  
pro singulare favore.

## Meicu santu de vida...

Già ch' in sa corte celeste  
ses Antiocu potente,  
de famene, abbas e peste  
libera tottu sa zente,  
faghe chi su penitente  
lu perdonet su Signore.

Meicu santu de vida,  
Sant' Antiocu dottore.

## II

(Testo presente nelle raccolte Calvisi e Bulloni)

Terrore de su *paganu*,  
de s'ecclesia santa onore,  
meicu santu de *vida*,  
Sant' Antioctu dottore.

Ses naschidu in s'oriente  
dae mama cristiana  
ch' affrontat s'ira pagana,  
bos educat santamente,  
comente sole lughente  
pienu de isplendore.  
Meicu santu de vida...

Pro medas ch' an abbrazzadu  
sa cristiana religione,  
crudele persicuzione  
contr' a tie at decretadu  
e cumandat ch' arrestadu  
benzas dae s'imperadore.  
Meicu santu de vida...

Bidendebos meda forte  
e in sa fide costante,  
preparat su dominante  
duros tormentos e morte,  
però non tenet sa sorte  
de essire binchidore.  
Meicu santu de vida...

Pro offerrer incensu impuru  
in tempiu de sos paganos  
portan, ma non son seguros,  
idolos meda ma vanos:  
cun medios soberanos  
destrues, pienu de orrore.  
Meicu santu de vida...

Adrianu atterrizadu  
de tantos bostros portentos  
cambiat luego pensamientos,  
bos mandat esiliadu:  
ind' un'ischiffu bettadu  
t'an a mare cun fervore.

Meicu santu de vida...

S'inicuu presidente  
de Casteddu relazione  
tenet de sa religione  
ch' imparades a sa zente  
e cheret chi prontamente  
bos arresten cun furore.

Meicu santu de vida...

Cando sa turba insolente  
bides in sa grutta intrare,  
bos ponides a pregare  
a Deus onnipotente,  
grazias pro sa sarda zente  
dimandades cun fervore.

Meicu santu de vida...

In s'istante azis *intesu*  
una 'oghe dae chelu,  
ei sa turba cun regelu  
bos incontrat *ispiradu*,  
pianghet e bos at *abbrazzadu*,  
li cambiat s'ira in amore.

Meicu santu de vida...

Cun miraculu plausibile  
azis sa vida agabadu,  
azis a Cristos guadagnadu  
sa turba tantu terribile  
ch' in furia tantu orribile  
mandat su guvernadore.

Meicu santu de vida...

O martire sulcitanu  
tant' onoradu in sa terra,  
pustis in s'ultima gherra  
non bos invochen invanu,  
dae Deus soberanu  
impretade su favore.

Terrore de su *paganu*,  
de s'ecclisia santa onore,  
meicu santu de *vida*  
Sant' Antiocu dottore.

### A Santu Nicola (6 dicembre)

(Testo presente nelle raccolte Calvisi e Bulloni)

Già chi sezis tantu amadu  
 dae Deus onnipotente,  
 Santu Nicola avvocadu  
 succurride custa zente.

In Licia sezis naschidu  
 dae zente cristiana,  
 azis bois abburridu  
 tottu sas richesas vanas,  
 bellesa e pompas mundanas  
 istimezis pro niente.  
 Santu Nicola avvocadu...

Esempiu de vida santa  
 mustrezis dae minore  
 sicundu esplicat e cantat  
 s'iscrittura cun amore;  
 sezis palma de valore  
 ch' est naschida in s'oriente.  
 Santu Nicola avvocadu...

Una grande tempestade  
 susseghezis in su mare,  
 passezis cun libertade  
 su golfu in su navigare,  
 fatezis resuscitare  
 unu mortu de repente.  
 Santu Nicola avvocadu...

A Palestina arribestis  
 allegru e cuntentu tantu  
 e inie visitestis  
 su Calvariu e logu santu,  
 causestis meda ispantu  
 a tottu sos de occidente.  
 Santu Nicola avvocadu...



De sa santa domeria  
fistis a Licia torrada,  
inie cun allegria  
bos an rezzidu e onoradu,  
bois bos sezis mustradu  
su piedosu e clemente.  
Santu Nicola avvocadu...

Non cuntentu in cuss' *istante*  
bi andezis cun amore  
ca Deus bos at *giamadu*  
pro pontifice e pastore,  
l'at fattu s'altu Signore  
pro miraculu evidente.  
Santu Nicola avvocadu...

Movidu a furia tanta  
su re Dioclezianu,  
pro 'ider sa vida santa  
chi fattezis fittianu,  
cun modu tantu inumanu  
bos arrestat prontamente.  
Santu Nicola avvocadu  
succurride custa zente.

A Nostra Segnora 'e sa Defessa che si venera in Gorofai  
(18 dicembre)

(Testo presente nelle raccolte Calvisi, Bulloni e in fogli sciolti)

Celestiale aurora  
de chelu e terra allegria,  
prega pro nois, Maria,  
de sa Defessa Segnora.

Arca inue s'insersit  
s'anzone divinu e puru,  
postu tranquillu e securu  
ue Cristos s'incarnesit,  
arca chi pura restesit  
de sa culpa manzadora.  
Prega pro nois, Maria...

Ite donu pellegrinu,  
ite grazias pius istragnas  
intrare in cussas intragnas,  
allattare in cussu sinu  
s'eternu Verbu divinu  
ed esserli genitora.  
Prega pro nois, Maria...

Ses cipressu virde, pinu  
in su Sionne esaltadu,  
ses cedru altu piantadu  
in su Libanu divinu  
pro mustrare su caminu  
a s'anima peccadora.  
Prega pro nois, Maria...

Sende tantu sublimada  
in su celeste emisferiu  
cun rajos de sant' imperiu  
ses Reina coronada,  
da s'Eternu preservada  
pura Virgine e decora.  
Prega pro nois, Maria...

Ses funtana de piedade,  
de grazias rodeada,  
vasu celeste narada  
de s'eterna majestade,  
ses de s'alta Trinitade  
fiza, isposa e genitora.  
Prega pro nois, Maria...

Palma cale pellegrina,  
de sos martires corona,  
deh! cun fervore matrona,  
de sas virgines Reina,  
sias de s'anima mischina  
avvocada e defensora.  
Prega pro nois, Maria...

Ses rosa cun meraviglia  
in Gerico piantada,  
*crede agonia dotada*  
*de su babbu eterna fiza,*  
*de grazias virde liza*  
*sos devotos a dogn' ora.*  
Prega pro nois, Maria,  
de sa Defessa Segnora.

**A Santu Tomas (21 dicembre)**  
 (Testo presente nelle raccolte Calvisi e Bulloni)

Dae Cristos cun amore  
 elegidu e acclamadu,  
 Toma apostulu sacradu  
 sias nostru intercessore.

De divinu amore azzesu  
 in su sacru apostoladu  
 su Nazarenu istimadu  
 cun valore azis difesu,  
 de sos barbaros in mesu  
 lu sighis senza timore.  
 Toma apostulu sacradu...

Contr' a s'eticu feu  
 intimas aspra battaglia,  
 cando che forte muraglia  
 t'oppones arreu arreu  
 de sa fide cun recreu,  
 de s'apostoladu onore.  
 Toma apostulu sacradu...

Manos, pedes e costadu  
 mustresit Cristos a tie  
 pro fagher credere a mie  
 ch' isse fit resuscitadu:  
 dubitende as colloccadu  
 sa fide senza timore.  
 Toma apostulu sacradu...

Armadu de fieru zelu  
 pro sa fide cristiana  
 sa provincia indiana  
 ti destinesit su chelu,  
 inie senza rezelu  
 preigas su Redentore.  
 Toma apostulu sacradu...

Cun divina eloquenzia  
sa fide b'as piantadu,  
a ischire lis as dadu  
de Cristos s'eterna essenzia,  
mustrendebos a evidenzia  
cun prodigios e favore.  
Toma apostulu sacradu...

Partos, Medios e Ircanos  
ti biden e ti rispettan,  
sos idulos tottu bettan  
pro si fagher cristianos,  
neghende a sos deos vanos  
incensu, cultu e onore.  
Toma apostulu sacradu...

Dae tottus acclamadu  
giustu, saviu e prudente,  
in Calamina su ree  
a morte t'at cundennadu  
e pro cussu coronadu  
ses in chelu cumprensore.  
Toma apostulu sacradu  
sias nostru intercessore.